

DINÀNUKILA



Myoyi kùdì bateèèleji balenga aba dilòòlò edi, Mwanèètù wa bakàji Webster nè Mwanèètù wa balùme Green, nè bateèèleji bônso, bidimba byà disangisha edi. Bitu misangu yônso ànu dyèsè bwànyì mèmè bwà kulwa ku nzùbu wa Mukalenge, nè pashìishe, dilòòlò edi, bwà kwalukila cyàkàbìdì mu umwe wa ku èkèleeziyà Yèndè yà Foursquare.

² Ndi mvùluka, kùkaadi bidimu, pangàakalwà bwà musangu wàkumpalà ku Los Angeles. Mwà mùmvwè bàakula bwà Mwanèètù wa bakàji McPherson, kàdi ùkaavwa mumanè kubànda bibàndilu byà ngòlò kumpalà kwà mèmè kulwa mu njila ewu. Nènku pangàakayà ku Los Angeles bwà musangu wà kumpalà, ngákaya too nè ku Forest Lawn. Mèmè kuumvwa nè yèyè wàkajiiikiibwa kuntwaku, ke mèmè kubànda nè kwimana ku lukitá lwèndè aku, nè kwinyika mutù wànyì nè kusàkidila Nzambi bwà nsòmbelu mulenga. Kwambwila ànu piinè apu, ndi mumòne cimanyinu cyà Foursquare pàmwè nè mu ditùnga dyónso mùndi mukenzè mudimu wà bwambi. Ndi mupetè dyèsè dyà kwikala mu ntempèlù, mwindile mu cibambalu cyèndè cyà dindila. Kumpalà kwà kuyayè ku cyambilu, ùvwa nè cibambalu muntwamu. Nè nkàadi musòmbè muntwamu, malòòlò àbùngì, pàmvwà ngàakula ku ntempèlù aku, nè ngèèla meeji pa mèbà àvwàyè mwà kwikala wànyina kumpalà kwà kubwelayè mu cyambilu, bunsantu bwà dikàngula naabù Díyì dyà Nzambi. Bwà kwikala kaaba aka, dilòòlò edi, nè bàmwè bàà ku bayiidi bàdì bàteeta kulama mukenji awu nè mwoyi: Nzambi ikalè neenù, ànùbènèshè.

³ Nè pashìishe bwà kwikala cyàkàbìdì nè Mwanèètù Green, mulundà munanga, wa mushinga mukolè, Mwanèètù wa balùme nè Mwanèètù wa bakàji Green. Nènku pàmvwà nsanganyibwa kuntwaku, kùkaadi katanci, nè mèmè kutwilangana nendè, mèmè—mèmè kumwambila mùmvwà musànke bwà diyiisha adi mu musambu, ditùkù dikwàbò, lwà ku beena kantu-ku-byanza kwàka, pa nè: *Dìna Dyà Yesù*, anyì cintu kampànda, mwàkaciibiikilaye. Kì mbanji kwikala bacikwàte pa mikàbà to. Mèmè kumwambila nè: “Ngìikalèku musùmbi wakumpalà,” cìvwa menemene, musambu mulenga wà dikèma.

⁴ Nènku mèmè kudyàmbidila nè mbafwànyine kungimbila dilòòlò edi pangàpwekì, nè—nè mukàjàànyì nè bàna bàdì paanyimà pàapa bwà kuwùtèèleja. Nènku ndi mutwishibwe mbasànke naawù pàabò. Kaadi díyì dyèndè kadyèna . . . Ndyà ciibidilu menemene kùdì beena mu nyùngulwilu wetù. Ndi nè mikàbà yèndè yàbùngì. Pàndì ndyùmvwa bibì menemene, ndi mbwelamu, ndi nè cìmwè cyà bisanji bìdì bimbisha mātadi abi, nè ndi ngèèlamù mushiki mujimà wà mātadi èndè awu,

nsòmba ànu lwà paanyimà apu ngènda ngatèèleja. Ndi muswè kwambila mukàjàànyì udi paanyimà pààpa wàwa nè, ndi mupetè ndambù mukwàbò wawò. Ndi nsànka naayì bikolè. Yìdi... Yìdi cisokomenu cyà diikishilamù, ànu bwà kuumvwa yôyì misambu yà Èvànjeeliyò ayi, bwà kumanya nè kî mmimba nè mèyì miibidija ku bukolè to, kàdi yìdi yìpàtukila mu mwoyi wà mwena Kilistò mulelèlà.

⁵ Mmungambile nè ùdi nè mikwàbò kuntu kwàka kàbìdì dilòòlò edi. Ndi muswè bwà mukàjàànyì, nè bóbò, bàyitàngile, bwà kumòna ní kùdi mikwàbò yìdiye naayì kuntu kwàka, yitùdi katùyì naayì, nè kwikala mutwishìibwe bwà kuyàngata. Ngèèla meeji nè bàdi naayì ku cibweledi. Nènku bàdi... .

⁶ Nudi bamanyè's, cintu cyà mushinga, cìndì mèmè ngèèla meeji ku dimba dyà misambu, ntu munange yôyì eyi. Ntu munangè mèyì miibidija, kàdi ncìtu muswè dīyī ditamba kwibidija kupicisha adi to. Dìbà adi udi ànu umòna mùdì mwà kushààla mulamè mweyelu wèbè, too nè padi kwìsù kùkushààla bleu, kàdi kùyì wamba cintu nànsha cimwè to nànsha bishi. Kàdi ntu muswè ngiimbìlù mwîmpè wa kale wa cyena mpenta awu, mùdì ànu udìbulula nè wimba. Ntu—ntu muswè aci. Nènku Mwanèètù Green ùdi nè cyòci aci, yèyè nè Mwanèètù wa bakàjì Green. Nè pa nàнку tudi bamanyè nè aci ncitwà nyama ku mikòlo kùdì kòralè eyi, nè bikwàbò. Nènku mbîmpè be bwà kumanya nè, bintu ebi, tudi mwà kubìpeta.

⁷ Mpindyewu, Mwanèètù—Mwanèètù Green nè mèmè twàkatuutakeena dyàmbedi, ngèèla meeji, ku dyànyì divùluka, ndi ngèèla meeji nè mùvwa mmu Kansas City, patùvwà nè ciibidilu cyà kwenza mpungilu kuntwaku apu. Mùshindù mwìnè wùmvwà nè ciibidilu cyà kushààla... Bàvwa bàmba nè: “Èè, dìbà dyà kubwela kî ndyanjì kukùmbana to.” Kàdi mvwa mwà kwindila mu kàshinyì kàànyì, nè mvwa muswè kwikala mutwishìibwe bwà kuumvwa dimba dyà misambu adi, pàvwàye yèyè—yèyè nè mwanèètù wa bakàjì munkaci mwà kwimba apu.

⁸ Ki mèmè kumwambila pambèlu apu, kwamba nè: “Ndi mutwishìibwe nè, dimwè dyà ku matùkù àdì panshì aa pangàasabukà dyàmwàmwa dyà musùlù...”

⁹ Mèmè ntu munangè kwimba misambu, bîmpè be! Kàdi ncyèna—ncyèna ànu mwà kwimba to. Kwàjìkì. Ntu misangu yònsò ànu muswè kwimba, kàdi ncyèna—ncyèna ànu mwà kucyènza to. Nènku mvwa nè ciibidilu cyà kuteeta kwimba musambu mu èkèleeziyà nè: “Disangisha dyà cyena kale mu mwaba wà cyena kale.” Mvwa mwà kucibwejakaja cyònsò. Mvwa mwà kukwàta mukàjàànyì ku cyanza pàmvwà ngàalukila kumbèlu, ngàmbe nè: “Munanga wanyì, ncyàdyàkuciteetakù kàbìdì to, nàнку ndi ngambilamù.” Ndi ànu... mbweja bantu bakwàbò bònsò mu cibwejakàjì.

¹⁰ Kàdi dimwè dyà ku matùkù àdi panshi aa nêngimbè. Nènku ntu ànu ndyàmbidila misangu yònsò nè, pàmwàpa ku luseke lwà kakùnà, mwaba wùdi musùlù wà—wà Mwoyi wùpweka wùfùmina ku Nkwasa wa butùmbi; piikalà kòralè munène wa bapikula bònsò awu, mèyi manène awu neikalè ku luseke lwà kakùnà aku, munkaci mwà kwimba. Ndi ntèkemena nè kùdi kaci kakesè kàà dilèji ku luseke lukwàbò aku. Wèwè muswè kummòna, lwàku ànu lwà pabwìpi apu. Nèngiikalè musòmbe mwaba awu, munkaci mwà kubàtèèleja.

¹¹ Kàdi pashiishe dîbà dyûdi ubwela mu nzùbu webè wa bukalenge, mu dindà kampàndà, nè upatuka uya ku lutanda lwà nzùbu webè wa bukalenge, nè lwà kwînshì aku mwaba kampàndà, lwà kwînshì aku mu mici, mùdi kazùbu kakesè kàà nsonà kiibakamù mwaba kampàndà, upatuka mu lutanda lwèbè nè utèèleja muntu kampàndà wimba musambu nè: “Ngàsà udi ukèmesha! dîyi dipòle kaayi’s,” wèwè kwamba nè: “Mwanètù Branham mukùlumpè awu mmufikè, bwalu’s ke yèyè awu. Ndekeelu wa byònsò yèyè—yèyè’s mmufikè kuntwaku.” Pa nànkù, nèngiikalè mukùmbàne mwà kwimba dîbà adi. Too nè dîbà adi bikèngela ànu ngènzè mutooyi wà disànkà bwà Mukalenge.

¹² Katwèna nè disànkà anyi? Katwèna nè cintu cyà kuditàcishila mu meeji to, nànsha cìmwè. Tudi bèle lwongò mu Kilistò, basòmbe mu myaba yà mu Dyulu, bambwibwe mu ngàsà wa Dyambwibwa mpindyewu mene, basòmbe mu Bwikadi Bwèndè mu myaba yà mu Dyulu mu Kilistò Yesù. Lufù lwólù lwinè kalwèna mwà kutùlengakù to. Bèlè lwongò, cintu nànsha cìmwè kacyèna mwà kutùtácishakù to, ànu bakùbiibwe cyanààna nè bindile Dilwa Dyèndè. Nènku tudi nè kusàkidila bwà bwalu ebu.

¹³ Mpindyewu, ndi nè kilòmèetà mitwè ku nkàmà yìbìdi nè makumi ànaayi yà kwendesha màshinyi dilòòlò edi, paanyimà pàà disangisha. Nènku nè musùmbà mulenga bu ewu nùnkù, pàanyi bìdi bìngangata ntàntà mule bwà kutwàdija, nè pashiishe ntàntà bule nànkù misangu yìbìdi bwà kwimanyika. Nènku nènteetè bwà kubwela buludi mu cìndi mulongòlòle bwà kwamba, nè lùkàsà lwònsò. Ndi muswè kusàkidila mpaasàtà, bakwàcishanganyi nendè bàà mudimu nè bònsò, bwà mpùngà ewu wa kulwa kaaba aka, bwà kufila bujaadiki bwànyì bwà ngàsà Wendè dilòòlò edi, mu disangisha dilenga edi.

¹⁴ Mwawa mubànde, kùkaadi cikondo, kuulu ku South Mountain, mèmè kupwekesha mèsù mu cibandabanda amu. Mènè kwela meeji ku bidimu bitwè ku makùmi àsàtù nè bitaanu kacya ngàbwela mu cibandabanda eci dyàmbedi. Mùshindù mene wùdi cimenga eci cidyunde, citangàlàke ànu mu Cibandabanda cyònsò cyà Maricopa eci. Ànu mu ntàntà yònsò ùdi mwà kumòna awu, n’cimenga. Mwawa musòmbe mwaba awu nè mukàjàànyi, ki mèmè kwamba nè: “Udi mumanyè’s,

munanga wanyì, pàmwàpa kùkaadi bidimu bitwè ku nkàmà yisàtù, kakùvwa cintu nànsha cimwè civwà cinyeemakana mwab'ewu to pa kuumusha bisùmbù byà mibwàbwà nè ngulube yà diitu, nè bikwàbò, lwà eku nè eku kwà ditùngà dijimà. Ke pashìishe muntu kubwelayè nè kubangayè kwibaka. Dìbà adi ke dishidimuka kubanga kutangalaka. Pashìishe ke mpèkaatù nè cinyangu kutwàdijamù."

15 Mémè kudyàmbidila nè: "Ewu kî mmufwànyineku kwikala mwaba mulenga wà dikèma anyi?" Ntu ànu ndyàmbidila misangu yònsò nè dīngà ditùkù ndi muswè kusòmbela mu Phoenix. Nènku dībà adi mémè...pàmvwà ntàngila mu cibandabanda amu, mvwa ànu menemene mufwànyine, munda mwà mwoyi wanyì, kudyumvwa bu udi udila mwadi, pàwù's wùvwa mwà kwikala mwaba mulenga be bu kamùyì mpèèkaatù.

16 Mùshindù mwinè ùdìbo bangàte ànu cipèèlà kàdi kucikùdimuna cishààle—myaba yà kusòmbela's! Leelù ewu tuvwa twendela paanyimà pàà mukùnà wà Camelback, bisòmbelu bimpè kuntu kwàka, byenzè ànu bu udi wenda ubwela mu mpalàdiizò. Nènku dībà adi mbifwànyine kwikala bilenga be, kàdi mpèkaatù ùdi kaaba aka myaba yònsò: binwìnù byà wiskì, masandi, ànu bintu byònsò byà bibi ebi, bilèma byà mīshindù yònsò, nè matèyì à mwena lukunà, bwà kukwàta misùukà yà bantu.

Mukàjàànyì kwambayè nè: "Kàdi bwà cinyì udi kaaba aka, Billy?"

17 Mémè nè: "Munanga wanyì, nciflìke. Kàdi, nudi bamanyè's, kùdi, mu mīdimà yònsò yà kuntwaku ayi, kùdi tutobà tukesè twà Bukènkè. Abu's mbasungula bàà Nzambì. Ndi mwab'ewu bwà kutwà dyànyì dikaaya ku àbò, kutwà wànyì mwoyi ku yàbò, dīyì dyànyì nè dyàbò, nè kukòbola kulwisha mīdimà."

18 Ke bwà cinyì ndi cyàkàbìdi apa mu Phoenix emu. Nzambì wa mu Dyulu àtùkwàcishèku. Nènku paanyimà pàà dilòòlò dimanè kujika, nè disangisha dyètù dikesè didi munkaci mwà kupitàkana mu cimenga emu edi, ku èkèleeziyà nè ku èkèleeziyà, munkaci mwà màngumba ónsò à Èvànjeeliyò mu kaabujimà, nènku bààkajikija nè mpungilu wa beena kantu-ku-byanza ku Ramada kwàka, ndi mutwìshìibwe nè netùshiyè cimanyinu kaaba aka, cìikalà mwà kumvwija nè mu Bukènkè bukesè bùdi butangàlake ebu, nè misùukà yàbùngì neyìpetè Kilistò, babèèdì bààbùngì bàdì nè diitabuuja nebòndopiibwè. Tukàadi babange kumòna, tuleeja bipeta.

19 Nènku ndi nè dyeyemena, dilòòlò edi nè, kwòkò muntu kampàndà udi mwà kulwa kaaba aka dilòòlò edi, mu bukùbì bwà—bwà cisokomenu cyà mwaba ewu ebu, bwà nè cintu kampàndà necyàmbiibwè mu musambu, mu bujaadiki, anyì mu dibala dyà Dīyì, anyì cintu kampàndà, cìikalà mwà kukufikisha

ku dipàtuka pambèlù mwikàle muntu mushiilàngàne kupita paùvwà mubwele. Twambùlwishèku bônso bwà kucyènza.

²⁰ Nènku mpindyewu kumpàlà kwà twètù kuseemena ku Dìyì, tusemenàayi kùdi MwenaDì mu disambila. Twinyikàayi mitù yètù bwà katanci kakesè cyanààna. Nè mitù yètù nè myoyi yètù miinyika kumpàlà kwà Nzambi, nkufwànyine kwikala dilomba munkaci mwà bantu dilòlò edi, dyà nè udi nè cintu kampàndà cyà pabwàci mùdi muswè kulomba Mukalenge bwà kukukwàcisha anyi? Elà ànu cyanza muulu cyanààna. Nènku munda mwà mwoyi wèbè amu, ambà nè: “Mukalenge, Wèwè’s udi mumanyè cidici.” Twasàkidila. Nzambi àkubènèshè.

²¹ Taatù wetù wa mu Dyulu, tudi tulwa mpindyewu mu Dìna didi dikumbàne mu byònsò adi, Mukalenge Yesù, bamanyè nè Yèyè wàkalaya eci nè: “Nwènù balómbe Taatù cintu kanà cyònsò mu Dìna Dyànyì, necifidiibwè.” Tudi tulwa, dyàmbedi, bwà kutonda nè tudi benzè bilèma. Tudi benzè bibi. Nè kakwèna nànsha umwe wa kutùdi udi mwimpè to, nànsha umwe. Nènku tudi tulwa bwà kutonda mpèkaatù yètù, mu Dìna dyà Mukalenge Yesù. Tudi tulomba difwidiibwa dyà luse.

²² Nènku Wèwè uvwa mumòne byanza byà bantu, bìvwà byela muulu dilòlò edi, nè Wèwè udi mumanyè cìvwà mwínshi mwà cyanza aci, cìvwàbò naaci dìjinga aci. Nènku ndi ndàmbula disambila dyànyì pàmwè nè dyàbò, ndyadija pa cyoshelu Cyèbè, nè ndòmba luse, bwà Wèwè, Mukalenge, wàfilakù luse, nè wàdamunèkù dilomba dyònsò.

²³ Tudi baswè kuKusàkidila bwà èkèleeziyà ewu, bwà bampaasàtà bèndè, nè bwà beena kwitabuujà bônso, nè balami nè balubuludi, nè bônso bàdi bàlwa abu. Bàbènèshèku, Mukalenge. Nènku tudi bamanyè nè masangisha ètù nè didisangisha pàmwè mbifwànyine kwikala ànu mu cijèngù, Wèwè kuyi mudisangishe neetù.

²⁴ Pa nànu tudi tulomba, Taatù wa mu Dyulu, bwà twikalèku nè ditwishibwa mpindyewu dyà nè Wèwè udi neetù. Túngunukàku, Èyì Mukalenge, bwà kwikala neetù bufùkù bujima ebu. Tùkwàcishèku. Ku mpùùkàpùùkà, kwòkò kufwànyine kwikala aba bàdi bàfùmina mu mùsèèsù, anyi mu mpangu nè mu bibeeba byà buloba, bàdi, mu nsòmbelu wabò, kabàyi bàKucyùka nànsha abu, swàkù bwà edi diikalè dilòlò dyàmbàbò “èyo” udi mukumbàne mu byònsò kùdi Nzambi, nè kudifila, bàdifila bòbò biinè kùdi Yesù Kilistò.

²⁵ Kwòkò babèèdi munkaci mwètù, Mukalenge, Wèwè udi Ngàngàbukà munène Utu kacya kàyiku mupangile bwalu to.

²⁶ Tudi twela meeji ku ditùkù ditùdi nè mwoyi edi, didi bubèèdi nè mfidimà yà mupimbu munkaci mwà kubwikila buloba. Kàdi tudi twela kàbidi meeji nè paùvwà Wèwè ulombola cisàmbà Cyèbè, Mòsà wàkabàpàtula mu—mu Èjiipitù, ùya naabò ku buloba bulaya, nè mu lwendu lwònsò amu munda mwà

bidimu makùmi ànaayi, nènku pààkabwelàbo mu buloba bulaya kakùvwa muntu nànsha umwe nè butekètè munkaci mwàbò to.

²⁷ Bangàngàbukà búngì kaayi dilòlò edi bàdì baswè kutàngila pa kabèjì kàà bwanga kàvwà Mòsà naakù aku, kààkalamà bantu bònsò abu nè mubidi tumatuma munda mwà bidimu makùmi ànaayi aku. Kàdi, nànsha nànkù, Wèwè kwèna mucisokòke to. Udi mutùmanyisheci bònsò, nè ncifùnda kaaba aka pa mabèjì, bipeepèle menemene. “Ndi Mukalenge udi wondopa màsaamà èbè ònsò.” Swàkù bwà tùfikè ku dyumvwa aci dilòlò edi, Mukalenge, babèèdi nè bàdì mu lukèngelu, nè kumanya nè kakwèna bubèèdi kampàndà bùdì Wèwè kùyi bwanga to, bwanga njila yìbìdì.

²⁸ Bèneshàku kubala kwà Dìyì Dyèbè. Nènku swàkù bwà myoyi yètù mpindyewu yilwe ku dísù dikolè dyà disangisha. Kuumukila ku myoyi yètù myùlè nè disànkà bwà dimba dyà misambu yà Èvànjeeliyò, nè majaaniki, nè bikwàbò, tudì ànu nè kusàkidila kwàbùngì. Mpindyewu swàkù bwà tütèelejè Dìyì Dyèbè. Nènku akulàku neetù, Taatù, nè bèneshàku tuntu tukesè tùdì tulongolola bwà dilòlò etu, bwalu tudì tulòmba nùnkù mu Dìnà Dyèndè nè bwà butùmbì Bwèndè. Amen.

²⁹ Kùdì bantu bààbùngì bàdì, mu dilwa ku disangisha, mbaswè kufùnda misangu yònsò ànu cidi mwambi nè cyà kwamba, anyi kubala mu Mifùndu. Nènku panwikalà nwenza nànkù, ndi muswè bwà nùbuululèku pàmwè naanyi dilòlò edi ànu bwà kubala kukesè cyanààndà kùdì kùsanganyibwa mu Mukàndà wà Èvànjeeliyò wa Maatàayi Munsantu, nshapità wa 15, mvensà wa 21 too nè ku wa 28. Ndi muswè kubala cyòci eci.

Dibà adi Yesù wàkaya kuntwaku, nè kubwelayè mu nseke yà Tuulò yà ku Sidònà—Sidònà.

Nènku, mònaayi nè, mukàjì wa mu Kaanààndà wàkapàtukila ku nseke yimwèyimwè ayi, nè wàkamwela lubilà... Mfwilèku luse, Éyì Mukalenge, wèwè mwàndà wa Davidi; mwanàanyi wa bakàjì mmutàcishùibwe bikolè kùdì démon.

Kàdi yèyè kààkamwandamunakù dìyì nànsha dimwè to. Ke bayiidi bèndè kulwabò nè kumusèngeleelabò, bàmba nè: Mwipàtè; bwalu yèyè ùdì wènda ùtwèla mbilà.

Kàdi yèyè wàkandamuna è kwamba nè: Ndi mutùmùibwe ànu kùdì mìkòòkò mijimìne yà nzubu wa Izàlèèlà.

Pashùishe kulwayè nè kumukuukwilayè, wàmba nè: Mukalenge, nkùwàcishèku.

Kàdi yèyè wàkandamuna è kwamba nè: Kì mbikùmbàne bwà mèmè kwangata dyàmpà dyà bàndà, nè kudyèlèla mbwa nànsha.

...yèyè kwamba nè: *Bulelèlè, Mukalenge: nànsha nànkú tubwà tátu tudyà...tusùnsukilà tùdì tùmata ku mèèsà à baamfùmù atu.*

Pashìishe Yesù kwandamuna è kumwambila nè: Éyi mukàji, diitabuuja dyèbè ndinène: bikwenzèkèlè bu mùdì muswè amu. Ke mwanèndè wa bakàji awu kwondopiibwayè kubangila ànu pa diinè dîbà adi.

³⁰ Bu mèmè mwà kubiikila eci nè ncyena-bwalu, ndi muswè kwakula ànu bwà katanci kakesè cyanàànà, ànyi bwà tusunsa tukesè, èyowà's wè, pa cyena-bwalu cyà nè: *Dinànuquila.*

³¹ Mèmè kudyàmbidila nè, bu mùvwàbi nè Mándàmù McPherson nè èkèleeziyà batu misangu yònsò ànu biimànyine nè bukitù bònsò dyondopa dyà kùdì Nzambi, nè katwèna mwà kuyiisha Èvànjeeliyò mu kaabujimà katùyì tuyiisha dyondopa dyà kùdì Nzambi to, bwalu ncitùpà cyà Èvànjeeliyò.

³² Ndi mvùluka, bu mwànà mukesè wa balùme, mbala kaabwalu mu cìmwè cyà ku bikàndàkàndà, *Life* anyi *Look*, anyi bimwè byà ku bikàndàkàndà abi. Ncicivwa ànu mwànà mutekète wa citende. Mùvwàbo bàseka Mándàmù McPherson, bwà diyiisha dyà dyondopa dyà kùdì Nzambi, nè bàvwa bàmba nè yèyè ùvwa nè—nè diyelè kampàndà òvwàye wènza. Bàmba nè: “Bakàji bàvwà nè bibòdibodi; ùvwa mwelè mpengèlè mwínshi mwà munu wèndè, nè bakàji bèlè tùpòmjà mwínshi mwà bilàmbà byàbò. Pashìishe Mándàmù McPherson ùvwa mwà kutentekela mukàji ewu byanza, ùvwa mwà kutwà mpengèle mu—mu kàpòmjà aku, nè ùvwa mwà kupàtula mupùùyà mu kàpòmjà aku.

³³ Mwà ngènzàmpèkààtù, kàdi mwà nè cyumvwilu cìmpè kutàmba aci, bwà kwela meeji ku cintu bu nànkú. Bu mpengèlè mwà kutwà mu kàpòmjà, kàvwa kafwànyine kutaayika. Ke mèmè kwamba nè: “Kakwèna mpatà to bwà nè mukàji awu ùdì ùtwàla dikèngeshiibwa.” Nè pashìishe, kacya ngashàala mwenji wa mudimu mu budimi bwà mvinyò, ndi njingulula cìvwàye nè cyà kutwàla aci. Paùdì wimanyina malelèlè, udi misangu yònsò ànu mukinyiibwe kùdì mwena lukunà.

³⁴ Mwàkù ewu *musùmìnyine* ùdì wùmvwija nè kwikala, ngèla meeji, bilondèshile Webster, “munànúkidi.” Kwikala *musùmìnyine*, “munànúkile mu dikùmbaja dyà kiipàcìlè kampàndà.” Nè muntu yònsò pa buloba, anyi uvwakù pa buloba, ukààdiku kacya mukùmbaja cintu kanà cyònsò, uvwa...ukààtukù mwenze cintu kanà cyònsò cyà mushinga eci, byàkakèngela bwà kusùmìnyinayè. Bivwa bikèngela wèwè kwikala mutwìshiibwe, dyàmbedi, bwà mu cìdì diitabuuja dyèbè dyelè longò.

³⁵ Mpindyewu, diitabuuja kadyèna ànu cintu kampàndà cyà cìlèlema bipeepèlè to, nè cintu kampàndà cyà...mutùdì mwà kucibiikila, mu ngaakwilù wà mu mùsèèsù, dijimbu

kampàndà. Diitabuuja didi ànu mwà kupeta wàdì—wàdì mwaba mujaalàme pàdidi ditèèkìlbwè pa cintu kampàndà cyà kaciyi cinyunishiibwa.

³⁶ Bu mémè mwà kukwambila bwà wèwè kupàtuka kuya katenteka cyanza cyèbè pa mucì awu nè kwondopiibwa, udi mwà kucyèla mpatà. Pa nànkù, mbwà cinyi? Katwèna nè pàà kushindamijila cintu nànsha cìmwè to. Wèwè udi mufwànyine ànu kwikala nè dîyi dyànyì. Nènku bu mémè mukwambile nè kwowa mu màyi kampàndà pambèlu apa mu—mu cibandabanda nkufwànyine kukutwàdila dyondopiibwa, mbifwànyune kwikala bilààle ku mùshindù wùvwà ungeyemena.

³⁷ “Nè diitabuuja didi difùma ku ditèèleja.” Ku ditèèleja dyà cinyi? “Dîyi dyà Nzambi.”

³⁸ Ki bwà cinyi, pìikalàbi nè *Eci* n’Dîyi dyà Nzambi, nè n’Dyòdì, cìdìDi dilongesha aci tudi mwà kuCyèyemena. Nzambi kèna mwà kushintuluka to. Nzambi ùdi nè cyà kushààla kashidi Nzambi. Dîyi Dyèndè didi nè cyà kwikala dilelèlè mu cikondo eci ànu mùvwàDi kwònsò eku mu cikondo kanà cyònsò amu.

³⁹ Mpindyewu, twètù tudi nè mikàlu. Tudi mwà kwamba cintu kampàndà cidimu eci, nè pàmwàpa nànsha mààlabà kukèngelabi bwà twètù kucishintulula. Bwalu, katwèna batàmbe kwikala batwishiibwe to, bwalu tudi nè mikàlu. Tudi ànu munkaci mwà kucinkila cyanaàna. Nè *kucinkila* mbwena kwamba nè “kudyela mu bwalu kùyi nè bukòòkeshi nànsha.”

⁴⁰ Kàdi pàdì Nzambi wàmba cintu kampàndà, ncipwàngàne. Kabyèna bikèngela bwà Yèyè kucishintulula to. “Abraham kààkatènkakanakù ku mulayi wà Nzambi ku bupidyà to; kàdi ùvwa nè dikàndà, mwikàle ùpèèsha Nzambi butùmbi, bwalu ùvwa mumanyè nè Yèyè ùvwa nè bukolè bwà kwenza, anyi bwà kulama, anyi bwà kwenza cìvwàYe mulayè aci.” Dìbà adi, Nzambi Yèyè ànu mubiikidiibwe mu cyalu bwà dipàngadika kampàndà, nè dipàngadika didi Nzambi wàngata, dyàmbedi adi, didi nè cyà kushààla dimwèdimwè adi kashidi. Kadyèna mwà kushintuluka to. Kadyèna mwà kushintuludiibwa to, bwalu Yèyè kèna nè mikàlù to. Nè cintu kanà cyònsò cidi kaciyi nè mikàlù eci kacya kacitukù nè ntwàdijilu anyi nè ndekeelu to. Pa nànkù Yèyè kèna mwà kucyùmusha cidimu cidi cìlondà, nè kwamba nè: “Mvwa mutùpàkàne” to.

⁴¹ Nènku dìbà adi pìikalàbi nè aci ke cìvwà dipàngadika Dyèndè, dìbà adi muntu yònsò udi wenza cìmwècìmwè aci, uh, ùfika ku dipàngadika dimwèdimwè dyàkangatà Nzambi bwà muntu kampàndà adi pa diitabuuja dyèndè, bwà kudìitabuuja, Bikèngela àkùmbaje cintu cìmwècìmwè aci musangu wònsò wùdì muntu ùciitabuuja. Bikèngela bwà Nzambi ènzè maalù, musangu wònsò, mùshindù wàkenzàYe musangu wà kumpàlà awu, cyanaàna Wakenza bibi musangu wà kumpàlà awu. Nènku

nganyì udi mwà kupiisha Nzambi nè mmwenze bibi? Bikèngela Nzambi àshaalè ànu nè dipàngadika Dyèndè.

42 “Bu wèwè mwà kwitabuuja!” Mpindyewu, bwà kukumbaja cintu kampàndà, bìdi bikèngela wèwè kutèeka kiipàcilà nè kwamba nè: “*Eci* ndi ngiitabuuja,” nè kudiswika wèwè mwinè ku cyòci, kàdi tùngunuka nè kukòka, wenda useemena pabwipi naaci, mumanyè nè udi nè. . . cidikù, mumanyè nè kùdi cintu kampàndà kuntwaku kùdi ukafika.

43 Ànu mwàkambàbo, bwà mwànà wa balùme mukesè mukwàte kandekè kàà dibèji, mukwàte mwonji mu cyanza cyèndè. Awu nè, muntu awu kwambayè nè: “Cyùdi mukwàte ncinyi, mwanàanyi wa balùme?”

Yèyè nè: “Kandèkè kàanyi.”

Yèyè nè: “Mèmè ncyèna mmòna cintu nànsha cìmwè to ànu mwonji.”

Yèyè nè: “Kàdi’s kùdi kandèkè ku ndekeelu kwàwù aku.”

Muntu awu kubàndulukayè, kwambayè nè: “Ncyèna mmòna kandèkè aku to.”

Mwànà mukesè wa balùme awu kwambayè nè: “Nànsha mèmè pàanyi ncyèna mukàmòne to.”

Yèyè nè: “Kàdi, wàmanyi bìshi nè udi nè kandèkè?”

Yèyè nè: “Ndi mwà kukùmvwa kànyunga ku ndekeelu aku.”

44 Èè, mùshindù awu ke wùdi diitabuuja. “Diitabuuja ndilenga dyà bintu bitèkemena, cileeeji cyà bintu bìdi kabiyi bimwèka.” Paucidi ànu mutèekèpù diitabuuja dyèbè, nè pashiishe mwelè lwongò mwómò amu, neufikèku. Nànsha wèwè kùyi mwà kucimòna, anyi to, udi mumanyè nè cidikù nànsha bìshi. Udi ucikòka, nè cyòci cidi cikukòka. Nè muntu kanà yònsò ewu utukù mwènzè cintu kampàndà cyà mushinga, ùtu mudiimànyikile kiipàcilà, nè pashiishe ùvwa munànùkile, musùmìnyine, bwà kwenza cyòci aci: bantu banène.

45 George Washington, “tatwèndè wa ditunga dyètù,” mùdiye ùbìkidiibwa, pàakalwàye mu Valley Forge, paanyimà pàà mushààle bufùkù bujimà mu disambila, too nè mwàkabolàye nè nèjè, kumufikilayè nè kuulu kwà cifùkà cyèndè, mutwè binù mu nèjè, pàakacyàbu mu dindà wàkasabuka musùlu wà Delaware, mùle tente nè mabwe à mashika. Bwà cinyi? Ùvwa musùmìnyine. Yèyè ùvwa nè dyandamuna. Cintu nànsha cìmwè kacyàkucyàmakana mu njila wèndè to. Nànsha mùvwà ntende yisàtù anyi yinaayi yà cingoma. . . ntende yà cingoma kupicilayi mu nkooci wèndè, kàdi kayàkamwenzela bwalu nànsha. Kuteetayè. . . Ùvwa muswè kukumbaja cintu kampàndà, nè yèyè ùvwa musambidilemù bwà cintu aci, kàbidi ùvwa musùmìnyine. Cintu nànsha cìmwè kacyàkiimana mu njila wèndè to.

46 Nudikù mwà kudifwànyikijila Noà mu matùkù èndè amu, mùvwà Noà munànùkile anyi? Mpindyewu, yéyè's ùvwa ànu cidimà.

47 Nè bàvwa nè mwoyi mu ditùkù ditàmbe bunène dyà bukébikebi bwà maalu à mamanya, pàmwápa, kutàmbe mutùdi naabi leelù ewu, bwalu mu matùkù awu bàvwa biibàke bipaapu byà misàkà. Kàdi bu umwe wa kunùdi mwà kwikala mupetè dyèsè dyà kwikala ku cipaapu cinène cyà musàkà cyà mu Ejiipitù aci nè kumòna Lupingù lwà ntambwe wa mutù wà muntu alu nè bikwàbò, mòna's, bìdi bikèmeshwa bwà kubimòna. Mmùshindù kaayi mwine wùvwàbò babàndishe mabwe manène awu mu lupeepèlè, matumbùke bu mu ntàntà wà kuumuka ku disangu dyà cimenga kuya ku dikwàbò, àvwa nè bujitu bwà binunu nè binunu byà tonnes! Leelù ewu katwèna mwà kubyènzulula to. Katwèna tuumvwa to. Bàvwa nè cintu kampàndà.

48 Bàvwa nè mpenci kampàndà. Bàvwa nè cintu kampàndà cìvwàbò mwà kwela mubidi wà citàlù kawùyi mwà kubola to, cìvwà cìfwànyine kucilama nè mmwènekeli wa ku cìfukilu munda mwà binunu byà bidimu. Katwèna nè ngenzèlù yà mamanyà ayi, meekala, nè bikwàbò, byàkadìbò naabi abi to; cikondo cinène cyà maalu à mamanya.

49 Kàdi dīngà ditùkù, pàvwà Noà ùsanganyibwa mu—mu mpàta, pàmwápa mwikàle ùlongolola byà pa madimi byèndè, Nzambi wàkamumwenekela nè kumwambila nè: “Dìlongòlòle bwà kusungila bàà mu nzùbù mwèbè, nè ibàkà bwàtù. Nènku mvùla neàlokè.”

50 Mpindyewu, tudi bònsò bamanyè nè, buloba bwà kumpàlà kwà mvùla yà Noà, mvùla kàvwa mulòke to. Nènku mpindyewu, aci kacìvwa cìpetangana nè beena meeji bàà maalu à mamanya bàà mu ditùkù adi to. Mukenji Wèndè kawùvwa wùpetangana to. Kakùyì mpatà to beena maalu à mamanya bàà meeji matwè abu bàvwa mwà kwikala balwè kùdiye bambè nè: “Mpindyewu, tàngilà kùnweku, Mukalenge Noà. Mpindyewu tudi nè byamu byà mudimu bitùdi mwà kulenga ngondo, nè tudi mwà kwenza lukèbukebu lwònsò lwà maalu à mamanya elu. Nè kakwèna màyi muulu mwàmwa to. Kàdi mmunyi mùdi màyi mwà kufùmina muulu mwàmwa, pàdiku kakùyì màyi muulu mwàmwa àdi mwà kupweka? Udi mukùtàkàne. Udi wenza cintu kampàndà cìdi kaciyi nè bwà nsongo to. Kakwèna màyi muulu mwàmwa to.”

51 Kàdi Noà ùvwa mwà kwamba nè: “Nzambi ùvwa mwambè nè mvùla neàlokè, nè aci ncikòse bwalu. Nzambi ngudi mwambè nànkù.” Bidimu lukàmà nè makùmi àbìdi, ùvwa munànùkile kumpàlà kwà beena maalu à mamanya bàà mu ditùkù dyèndè, mutungùnùke ànu nè kushindika nè Mukenji wèndè ngwà cyà bushùwà bwalu Mmufùmine kùdi Nzambi. Ùvwa nè kiipàcilà kàà kwenza. Ùvwa nè Mukenji wa kutàbaleela, kàdi ùvwa nè dinànukila mu kwenza kwà nànkù awu. Nànsha bakwàbò bònsò

bàà pa buloba bambè cinyi, Noà ùvwa mutèèleje byà kùdi Nzambi. Ke cyònsò cìvwà nè musinga kùdiye. Yèyè wàkadi muumvwè Dìyì. Ùvwa mutwìshìibwe nè Ùvwa n'Nzambi, nè ùvwa munkaci mwà kulongolola cintu kampàndà cìvwà cìmwèka cìcimbè bwà bàà pa buloba. Kàdi, nànsha nànkù, Noà ùvwa mumanyè nè Nzambi ùvwa mwà kushààla mukwàte ku Dìyì Dyèndè.

52 Aci kî ncifwànyineku kwikala dileesòna bwètù twètù leelù ewu anyi, dībà's? Bu mwàkambà Yesù nè: “Ànu mwàkadibi mu matùkù à Noà, ke mwìkalàbi kàbìdi ku dilwa dyà Mwànà wa muntu.” Mukenji ùdì mukùtakàne kùdi bàà pa buloba, kabèèna bàWùmvwa to, kàdi nànsha nànkù aba bààkapetà Nyumà Mwimpè abu, mbamanyè nè Yèyè neàlwe cyàkàbidi.

53 Ndi mwà kumòna mùvwà bantu buumvwila Noà mukwàte nè byà luse awu luse, bwà bùngì bwà bisankasanka bìvwàye ùpangila, nè byà pa buloba nè bintu bìdì munkaci mwà kwenzeka. Kàdi Noà, mwikàle ànu ùnànkila, kacya ànu wàkwàta.

54 Dìngà ditùkù Nzambi wàkambila Noà nè: “Èyo, wàmanyi kwenza wèbè mudimu mpindyewu. Mpindyewu bwelà mu bwâtù, wèwè nè bàà mu nzùbù mwèbè.” Nènku... Mònaayi nè—nè nyuunyi yàkabanga kubùùka yìbwelamù, nè—nè nyama kubanga kubwelamù, ku yìbìdì—ku—yìbìdì. Noà nè dīkù dyèndè kubwelabò.

55 Nè kutu misangu yònsò ànu beena kwitabuuja bàà ku mikàlu, mùntù mbàbìikila; bantu bìikalà mwà kulwa mu èkèleeziyà, nebàsankè nè mukenji pàmwàpa wà mu kòralè anyi mu bimbi bàà misambu, wà kùdì mwambi, anyi bujaadiki kampàndà. Nebàsankè naaci, kàdi, bwà kubwelamù nè kwikala citùpà cyàcì, kabàkucyènza ànu kucyènza to. Mbaswè kutèèleja, kī mbaswè kwikala citùpà cyàcì to. Kī mbaswè kufwanyikijibwa naabò to. Mbaswè kushààla kule ku luseke lùmwè. Ke mutùbi misangu yònsò, nè kakùyì mpatà to bìvwakù mu ditùkù adi.

56 Pashìishe pààkakàngiibwà ciibi cyà bwâtù, bààbùngì bàà ku bantu abo bààkamba nè: “Èè, túbandààyaaku kuulu nè twìmanè pabwìpì apu, mpindyewu, byòbi byenzèke nè, cileejilu, mukùlumpè awu ùvwa mubingè. Twètù bònsò tuvwa twela meeji nè mukùlumpè awu ùvwa ànu bu mujimije lungènyì, kàdi mvwa—mvwa—mvwa nsànka bwà kumutèèleja ùyiisha, mwimàne mu ciibi amu. Nènku mpindyewu tudi bamanyè nè cintu kampàndà ncikàngè ciibi aci. Mpindyewu, yèyè's mmuntu mwimpè. Nènku bu byòbi mwà kwenzeka nè, màyi àmatè muntwamu, mòna's, mòna's, yèyè's mmufwànyine kutùbweja.” Nudi numòna's, kanwèna baswè kweyemena... .

57 Kanùnanyì bwimpè bwà Nzambi to. Yikala mutwìshìibwe nè udi ubwela ànu paùdì nè mpùngà wa kubwela apu.

58 Pashìishe, katancì aka anyì, ditùkù dyàkumpàlà, mònaayi mùshindù ùdì Nzambì wèla bantu Bèndè ku diteecibwa, mîngà misangu, Ndi mwà kudifwànyikijila, ditùkù dyà kumpàlà, Noà kwambila dîkù dyèndè nè: “Èyo, mpindyewu netùbandè mu nzùbu wa kuulu. Mpindyewu, mu dindà, maulu neikalè mafîike. Kacya kaàvwakù mafîike kwònsò eku to. Kacya katutukù banjì kucimòna to. Mvùla neàlokè. Mikenyi neyítangalakè mu maulu mujimà.” Ke pààkacyàbu mu dindà dîbà kupàtukadi. Cimanyinu nànsha cimwè. Ditùkù dijimà, Noà nè dîkù dyèndè bààkatàngila. Èè, bintu kutùngunuka ànu menemene mwàbì nè kale amu.

59 Ndi ndifwànyikijila nè beena kwitabuuja bàà ku mikàlu bààkamba nè: “Kya, mukùlumpè awu’s ùvwa mutùpàkàne.” Bààkaalukila mu cimenga, bàdyà, bànwà, nè biikàle bàcyònkomoka.

60 Ndi ndifwànyikijila nè, dîkù dyèndè, nditeeciibwa kaayi divwàci nè cyà kwikala pa muntu awu’s. Kàdi yèyè kààkalekela to nè kubanga kukòòkola ku ciibi, wàmba nè: “Balùmyàna, sàkìlàayi ciibi cyunzulukè. Mvwa mutùpàkàne.” Bwà cinyi? Ùvwa mumanyè nè ùvwa nè bulelèlè, nè ùvwa ànu kacya wàkwàtakù.

61 “Mvùla yèyè kàyi mulòke leelù ewu to, neàlokè mààlabà.” Ke cyòci aci. Èyo.

62 Pashìishe ditùkù diibìdì kulwadì, nè tudi tumòna nè dîbà dyàkapàtuka. Dyàkasambuluka ànu mùvwàdi dyèenza ditùkù dyònsò. Cimanyinu cyà mvùla nànsha cimwè. Nànsha nànkù ùvwa ànu musùminyine. Too nè ku matùkù mwandamutekète, Noà ùvwa musòmbe ànu mwaba awu, wàmba nè: “Mvùla yèyè kàyi mulòke leelù ewu to, neàlokè mààlabà.” Nwamònu’s, ùvwa mwele lwongò. Ùvwa munànikile, musùminyine, bwalu ùvwa mumanyè nè Nzambì ùvwa mwambè nànkù, nè bìvwa bikèngela kwikalabi mùshindù awu.

63 Mpindyewu, ndekeelu wa byònsò, mu ditùkù dyà mwandamutekète, pààkatàngilàye pambèlu ku dididiishì, maulu àvwa ènda àbwicidila. Lupeepèlè lùvwa lùtuuta mu tukùnà amu. Mici yìvwa munkaci mwà kukòbama. Bantu bàvwa bèèla mbilà mikolè, kabàyi bamanyè cyà dyenza to. Ke paanyimà pàà katanci, mamata manènè à mvùla kubangawù kudituuta panshì bwà musangu wà kumpàlà, àdituuta mu misèèsù. Mikidì yà màyi kuulayi. Tusùlu tònso kupàsalalatù. Màyi kubangawù kubànda. Bantu kubwelabò mu màtù àbò, è kutùkinabò mu màyi. Mpeepèlè yìvwa mikolè. Ke kutàmbabi kwondoka nè kuya mu ndondo, nè mu ndondo. Paanyimà pàà katanci, kubangawù kubànda ku màzuwà awu. Yèyè kutàngidila pa dididiishì.

64 Ndekeelu wa byònsò, bantu kwelabò mbilà mikolè, kakùvwakù mùshindù wà yèyè kwolola cyanza nè kubàkwàta to. Yèyè ùvwa kuulu mu katòngòbèlè. Bàvwa benzè mpèèkaatù basambùke ditùkù dyàbò dyà ngàsà. Kakùvwa cintu nànsha

cimwè cishààle bwàbò bôbò to. Dìbà dikaavwa dimane kupita piinè apu. Ndekeelu wa byònsò, mûshindù mwinè ùvwà Noà nè cyà kwikala mudyûmvwe's, wè, pàakatàngilâyè pambèlu mu mùsèèwù nè kumòna tumâtù tukesè, ní tùvwà twibaka kùdì Nzambi anyi to.

⁶⁵ Nudi numòna's, bantu bàdi bèèla meeji nàнку leelù ewu. "Bàdi mwà kwibaka bwâtù bwàbò sungasunga. Bàdi mwà kwenza lupàndù lwàbò sungasunga." Kwèna mwà kucyènzakù to. Nzambi ngwâkatùpetela lupàndu, nè bìdi bikèngela bwà twètù kulwitaba. Bwâtù bwibaka ànu kùdì muntu cyanààna kabwâkwimana to. Cintu kanà cyònsò cidi muntu mwà kukumbaja aci, cidi cibèngangana nè diswa nè Dìyì dyà Nzambi aci, kacýâkwimanakù to.

⁶⁶ Kàdi mùvwàbi nè cyà kwikala pàvwà Màndàmù Noà nè bakàji bàà bàna bèndè, nè—nè mwànà—bànà bàà balùme, nè bikwàbò, pàakamònàbo màyi aa ènda àbànda ku mpengà kwà bwâtù, nè nànsha nàнку bwâtù bùvwà ànu kacýa bwàsomba panshi. Kàdi paanyimà pàa katanci kudyûmvwabò bu basùlùdibwe. Bùvwà bwènda bùlèlema. Kaa, Noà ùvwà mumanyè nè byònsò byèndè, bìvwàye muteetè bwà kukumbaja abi, cìvwàye mwenzè, Mukenji wèndè wùvwà munkaci mwà kufuta dìbà adi. Bùvwà busùlùdibwe. Uvwà munkaci mwà kuumuka pa buloba.

⁶⁷ Ànu mùdìbi pàdi muntu mwà kushààla, kàyì ùjuuka bwà kulabulangana ku cyanza nè mpaasàtà, kufùnda dîna dyèndè mu mukànda to, kàdi pàashààlayè mwaba awu too pùûmvwàye cintu kampànda cìsùlùluka munda mwèndè amu, nènku kubangayè kulèlema kuntwaku ku diitabuuja, mumanyè nè mpèkaatù yèndè yikaadi miyè, nè yèyè mmwelè lwongò lwà musùùkà wèndè mu Kilistò, nènku kùdì cintu kampànda cidi cìmutùntumuna muulu wènda ùtumbuka ànu kutumbuka; munànùkile, musùmìnyine.

⁶⁸ Mòsà ùvwà musùmìnyine bikolè, paanyimà pàa yèyè mumanè kupweka mu Èjiipitù nè mushipè muntu, nè dilonga dyèndè dyònsò dyà tûlaasà nè didìbidija dyèndè. Kàdi nànsha nàнку wàkenza cintu cibi, ùdi ùteeta, bwalu ùvwà mweyèmène cìvwàye mwà kukumbaja ku dilonga dyèndè dyà tûlaasà nè ku dyèndè sungasunga... Batu batwambile nè yèyè ùvwà mùsàlaayi. Ne cìvwàye mulongeshiibwe bwà kwenza aci, tudi tujandula nè cyàkapangila. Nènku pàakapangilaci, yèyè kààkasùmìnyinapù to, wàkaya lùbilu mu cipèèlà munda mwà bidimu makùmi ànaayi.

⁶⁹ Kàdi musangu kampànda wàkatuutakeena nè Nzambi mu cipuka cìvwà cilakuka kapyà, wàkakòpola bìsàbaatà byèndè, wàkamòna butùmbi bwà Nzambi. Wàkamòna dikombo dyùmè dyàndamuka nyòka, nè dyàlukila cyàkàbìdì dikombo. Wàkamòna cyanza cyà nsudi cyondòpiibwe ku bukolè bwà

Nzambì. Ke kuumvwayè Dîyi dyà Nzambì dyàkula nendè. Dîbà adi cintu nànsha cìmwè kacyàdyàkumwimanyikakù to.

⁷⁰ Misangu yàbûngì nkàadi mumuleejèleeje, ndi ntèkemena nè kî mmùshindù wà dinyangakaja cijila to, bu muntu mununu, wa bidimu makùmi mwandamukùlù, nè mukàjèndè musòmbe cibelu eku cibelu eku pa kampundu, nè—nè mwànà mwambula ku lubèsè. Ditùkù dyàkalondà . . . Nè mwedi cipambà mulembèlèlè, nè dikombo mu cyanza, wènda ùya, mèsù meela muulu, nè matàngija mu dyulu, nè mwedi mutòoke wùpeepa.

Kàdi muntu kampàndà kwambayè nè: “Kúyaaya nkwepi, Mòsà?”

⁷¹ “Nyàaya mu Èjiipitù, bwà kuya kamukwàta ku bukòokeshi.” Dibùcikila dyà muntu umwèpelè, bìvwa bimwèka bu macimbu. Kàdi njila yà Nzambì, bwà meeji à musunya, ng’wa macimbu. Kàdi ng’wa mushinga mukolè kùdi aba bàdi beelè lwongò mu yèyè. Mbamanyè cidibo bàmba aci. Bàdi bàkolesha. Kaa, cìvwa nè cyà kwikala cintu kaayi’s wè! Noà anyi. . .

⁷² Mòsà, èyowà’s wè, ùpweka mutàngile mu Èjiipitù, ditùnga divwà buloba bujimà bùciina adi, dýenzè bu Russie leelù ewu. Dibùcikila dyà muntu umwèpelè, muntu mununu, wa bidimu makùmi mwandamukùlù, nè mukàjèndè musòmbe pa kampundu, nè dikombo dikònyàngàle mu cyanza, wènda ùpweka bwà kukwàta ku bukòokeshi. Cintu, cyà pabwàci mu cyòci, kùdi bàà pa buloba, yèyè wàkacyènzà. Wàkangata bukòokeshi.

⁷³ Bidi bìkèngela Nzambì muntu ànu umwe, muntu umwèpelè, mwaba kampàndà, udi muswikila kùdiYe, muntu kampàndà udi mumanyè pàdiye mwimànyine nè udi musùmìnyine. Dikèngeshiibwa díbà adi, dishiilangana, kadyèna dìmutàcisha to, nànsha kakesè. Wènda ùya bwà kakwàta ku bukòokeshi, nè wàkacyènzà.

⁷⁴ Cyàkamwèka cikùtàkàne pààkiimanàku muntu kampàndà wa bule bwà metelè ànaayi, anyi mapite apu. Ngèela meeji, minu yèndè, bule bwà centimètres makùmi àsàtù nè yitaanu; nè difumà mu cyanza cyèndè, bu mulangala, pàmwàpa cyàbibidi cìmwè cyà kuumukila apa too nè ku ciibi kwàka; mwimàne kwàka, wèla Izalèèlè kadyòmbò. Kùvwa Shawùlà ku luseke lukwàbò, mutù nè makaaya kumutù kwà cilwilu cyèndè, muntu mulongèshiibwe, bònso bwàbò balongèshiibwe bimpè, nè benzela mikaaka. Ncyà bushùwà.

⁷⁵ Nè dyabulù ùvwa muswè kuumvwangana naabò. Mùshindù awu ke wùdi dyabulù wènzà pàdiye wèla meeji nè yèyè luseke lùdi lutàmbe bwimpè. “Lwâyì. Katulù kwela mashi panshi to. Ànu twètù bàbìdi. Mémè mucimùne muntu wenù, díbà adi netwikalè. . . nwènù nenùtùkwàcìlè mudimu. Yèyè munshebèye, díbà adi nekwikale ànu umwe wetù ùfwa pamutù pàà bilwilu

byètù.” Dyumvwangana kaayi didiye mwà kuleeja’s wè! Bantu bônso bàvwa nè bwòwà bwà lufù.

⁷⁶ Kàdi’s cìvwa cimwèka cicimbè bwà kumòna kànà kàà balùme kakesè, kàà tukaaya tukòbàme kàlwa mwaba awu kadìjìngìle cisèbà cyà mùkòòkò pambidi, ndundu wa nyuunyi muswikila ku cimònù, nè tùtùtò twà tumuma twà mvinyò mu cyanza, bwà kumòna bânà bààbò. Ke dyabùlù awu kuditàmbishayè kumpàlà kwà muntu wa Nzambi, musangu awu, ki kumutwàye cyàdì. Bwà cinyi? Ûvwa mumanyè nè Nzambi ùvwa Nganyì. Yèyè nè: “Nèngìikalè... Nudi baswè kungambila nè nenùlekelè bilwìlu byà Nzambi udi nè mwoyi nulekela mwena Pelèshèètè udi kàyi mutengula awu wèla bilwìlu byà Nzambi udi nè mwoyi kadyòmbò anyi? Mémè nènnye kamulwisha.” Kaa, ekèlekèlè! Bwà cinyi? Ûvwa munànùkile.

⁷⁷ Bânà bààbò bàà balùme kwambabò nè: “Kya, tudi bamanyè nè wèwè udi kantu cyanàànà. Alùkìlà kumbèlu bwà kutàbaleela mikòòkò yìvwà papa mukwambile ayi. Wèwè udi mulwè ànu mwab’ewu bwà kumòna mvità.” Kwèna mwà kucimuna muntu wa Nzambi mu dyakula, pàkaadì cintu kampàndà cimwenzèkèlè to.

⁷⁸ Pa nàнку kuyayè kùdì Shawùlà. Shawùlà, ngèèla meeji, kudikoonyaye mu mutù nè kutàngilayè panshi. Yèyè nè: “Ndi ngàanyisha dikima dyèbè, mwanàanyi wa balùme, kàdi muntu wàwa mmulwanganyi wa mvità. Muntu awu mmulwanganyi wa mvità, kacya ku bwànà bwèndè. Nèнку wèwè udi ànu mwànà mutekète, nè kwèna mumanyè kantu nànsha kàmwè pa bìdì bitàngilà ndundu wa nyuunyi anyi pa difùmà to, anyi mùshindù wà kulwangana mvità yà mikolè.”

⁷⁹ Kaa, kàdi mutàngilaayi mùdiye ùtwala cintu kampàndà. “Musadidi webè ùvwa ùlama mikòòkò yà tatwèndè.” Ke yèyè kwamba nè: “Dìngà ditùkù ours kulwayè nè kukwatayè umwe wa ku bânà bàà mikòòkò yà taatù wanyì, ke mémè kumudimbata, nè mémè kumushipa. Ke pashiishe nyama wa ntambwe kubwelayè nè kukwàtayè wùmwe nè kuyayè naawù, nè mémè kumudimbata, nè mémè kumushebeya. Mpindyewu,” yèyè nè, “Nzambi wákampèesha bucìmunyi pa ours nè pa nyama wa ntambwe awu, mmunyi mwàpangàYe kutàmba kumpèesha bucìmunyi pa mwena Pelèshèètè udi kàyi mutengula udi wèla bilwìlu byà Nzambi udi nè mwoyi kadyòmbò awu!”

⁸⁰ Shawùlà kwambayè nè: “Kàdi wèwè’s udi ànu mwànà.” Yèyè nè: “Kwèna nè kantu nànsha kàmwè pambidi to, ànu cisèbà cyà mùkòòkò. Indilà, mémè—mémè nènkuvwàdikè byà mvità byànyì pambidi.”

⁸¹ Ke kumwangatayè nè kumuvwàdikayè byà mvità byèndè abi. Nudikù mwà kudìfwànyìkijilakù anyi? Bible mmwambè nè yèyè ùvwa “mukùnzùbile,” kaamuntu kakesè menemene, pàmwàpa muntu wa kilò makùmi àtaanu, mulwàte byà mvità binène byà

muntu wa mufwànyine kwikala nè bujitu bwà kilô lukàmà nè dikùmi nè yitaanu, nè bule bwipacila ku metèlè àbìdì nè byà mu njila. Uvwa mushindikila yònsò panshì kùdì bujitu abu. Nudi mwà kudifwànyikijilakù cyà nànkù awu anyi?

⁸² Davidi kukènzakanayè. Makaaya yipacila bunène *abu* mamupite ku bunène. Nè civwa cimwèka bu jipè pambidi pèndè, mulembèlèlè nè kwìnshì mùshindù ewu, cibwikilu cyèndè cyà pa cyàdì. Wàkajandula nè cinkooci cyà butèndeledi aci kacivwa cikumbànyine muntu wa Nzambi to. Uh-huh. Yèyè nè: “Nguumùshaayi cintu eci pambidi pàànyì. Ncyèna mumanyè kantu nànsha kàmwè pa cyòci eci to. Kàdi ndekèlaayi nye nè cìndì mumanyè nè ncilelèlà.” Ki bwalu mbwòbù abu’s. Yèyè wàkaya mu bukolè bwà Nyumà.

⁸³ Ngèèla meeji nè ùvwa ng’Hudson Taylor wakambila musangu kampàndà mpàndànjlà wa beena Chine. Mwànà wa balùme wa beena Chine ewu kwambayè nè: “Mukalenge Taylor, ndi muumvwè dibìikila dyànyì mu Kilistò.” Yèyè nè: “Nye mpindyewu kulonga bwà kupeta dipòlomè dyànyì dyà bu Licencié, nè pashìishe bwà bu Ph. D., nè byònsò bìndì nè cyà kwikala naabì, dipòlomè dyànyì dyà bu docteur adi anyi?”

⁸⁴ Mukalenge Taylor kwambayè nè: “Ndààku mpindyewu, mwanàànyì wa balùme. Ndààku mpindyewu. Kwìndidi too nè pààlwà cikondo aci to. Neùjìmiyè byàbùngì bitàmbidìlè byà mwoyi wèbè.”

⁸⁵ Ngèèla meeji nè mmwòmò. Ndi ntwa ku cyà Mukalenge Taylor. Ndààku mpindyewu. Ncyèna nteeta bwà kutwà dipanga dyànyì nyama ku mikòlò mpindyewu mu kuteeta kwamba nè kabyèna bitùkèngela dilonga dyà kàlaasà to. Aci’s ncifwànyine kwikala nè mwaba wàci. Kàdi dilonga dyà tulaasà kadiyì nè lupàndu kadyèna nè lwongò to. Dyònsò didi ànu nè bilàmbà bikwàci byà lupeepà kàdi kakùyì lwongò to. Ndààku pàdì kàndeyì kateemesha. Kwìndidi too nè pààbùtukàku cyàbìbìdì cimwè to. Ndà pàdì ukàteemesha apu. Pawikalà kùyì mumanyè cintu nànsha cimwè to kutàmba mwàkateemàku, ambilà bakwàbò mwàkateemàku, pàmwàpa nebàteemè pààbò. Nwamònu anyi? [Katùpà kàà mukàbà wà mèyì munda mutupù—Muf.] Pa nànkù pàdì ànu kàndeyì kateemèshìibwe, nda ùkalondèlè muntu yònsò mwàkateemà kàndeyì kèèbè, nè pàmwàpa nebàteemenè ku wèwè aku. Nwamònu anyi? Mònaayi.

Cyà bushùwà, Davidi ùvwa munànùkile, bwalu ùvwa mumanyè.

⁸⁶ Shimishòonà bàakatwilangana nendè mu budimi dīngà ditukù kùdì beena Pelèshèètè cinunu bamunyùngùlùkile. Nè wàkakènzakana eku nè eku...Yèyè kàvwa muntu mwibidija uvwa mumanyè mwà kulwangana mvità to. Kàdi pàakakùdimunayè mutù wàkuumvwa cipungidi aci, bipya byà nsukì yèndè abi bimulengè pa makaaya. Ke cyònsò

cìvwàye nè cyà kuumvwa aci. Wàkapeta cintu cyà kumpàlà mu cyanza, cìvwa mmufùbà wà lubàngà lwà kampundu, kàdi kushebeyayè beena Pelèshèètè cinunu cijimà. Bwà cinyi? Ùvwa musùminyine bwalu ùvwa mumanyè nè Nzambi ùvwa mwenzè nendè cipungidi cyà bipya byà nsuki mwandamutekète. Pàvwàyi ànu milembèlèle mu mwaba wàyi apu, cintu nànsha cìmwè kacìvwa mwà kumutàcisha to.

⁸⁷ Kaa, mwanèètù wa balùme, mwanèètù wa bakàjì, mùshindù mwinè ùvwàbi bikèngela bwà Èkèleeziyà wa Nzambi udi nè mwoyi kwimanayè dilòòlò edi, munànùkile. Ntántà yònsò utùdì ànu mwà kuumvwa cipungidi cyà Nyumà Mwímpè, Mashi à Yesù Kilistò àtùkezula ku mpèkaatù yònsò, katùvwakù mwà kulekela cintu nànsha cìmwè ciimana mu njila wètù nànsha. Banànùkile, cyà bushùwà menemene.

⁸⁸ Yone, mupròfetà munène mwene bwalu bùvwàbo baakùle awu, bwà kjuuuka; pàvwàye mu cipèèlà, bàvwa bamwambile kùdì Nzambi. Bàvwa bindile maasiyà kampàndà, mu bushùwà bwà bwalu; bidimu nkàmà yinaayi kumpàlà kwà kwikalabò nè mupròfetà kampàndà. Kàdi, Nzambi wàkamwambila, mu cipèèlà nè: Yèyè nè: “Mpindyewu, nebàteetè bwà kukwambila nè: ‘Docteur *Kampàndà* ke muntu uvwa nè cyà kwikala Maasiyà, piikalèbi ne ng’wèwè udi nè cyà kuMumanyisha. Mòna’s, yèyè’s ke muntu udi mutàmbe bwímpè mu disangisha dyètù.’ Nèku nebàmbè nè: ‘Èè, mwikùlù wa—wa balùme wa mwakwidi mutàmbe bunène lwà kuntweku, yèyè’s—yèyè’s ke muntu uvwa ukèngela bwà kucyàngata,’ nè bikwàbò. Kàdi, tàngilà, Yone, eci’s mmudimu mulelèlè. Bikèngela wikalè mutwishiiibwe, pa nànkù nènkupèèshè cimanyinu. Pa Ewu uwàmòna Nyumà ùpweka nè ùshààlapù awu, nyèyè Ewu wabàtiiza nè Nyumà Mwímpè nè kapya awu.”

⁸⁹ Yone wàkiimana mwaba awu, kutàngilayè masangisha awu pàvwàbo bàlwa apu. Nènkù yèyè... Muntu nè muntu ùvwa ùlwa *cikampàndà*, *cikansanga*, nè *cikankènga*. Kàdi kàvwa mwà kuMumòna to. Dìngà ditùkù, pàvwàye mwimàne, ùkòkangana nè mwakwidi, wàmba nè: “Udi uswa kungambila nè cikondo necilwe ciikalà mulàmbù wà ku ditùkù nè ku ditùkù mwà kuumushiibwa anyi?”

Yèyè nè: “Nekùlwe Muntu.”

⁹⁰ Ke kutàngilayè. Ki cyòci aci. Kwambayè nè: “Mònaayi, ke Mwàna wa mukòòkò wà Nzambi udi ùmusha mpèkaatù wa bàà pa buloba wàwa.”

⁹¹ Yèyè ùvwa mucimanyè bwalu Nzambi ùvwa mumwambile nè: “Ewu uwàmòna Nyumà ùtùùlukila awu.” Ùvwa mucimanye. Ùvwa munànùkile.

⁹² Twàlukila kùdì mukàjì mukesè ewu. Tudi ànu nè bintu byàbùngì bitùdì bafwànyine kwamba pa bìdì bitàngila bantu

bashiilèshìilàngàne bàvwà banànnùkile, basùminyine, kacya ànu bààkwàta, bwà kukumbaja cyenzedi kampàndà.

⁹³ Ndi nè cìfidi cikesè, cìntù ngàmba misangu mivulè. Ncìfwànyine kwikala cìmpè bwà nwènnù kucyàngata. “Mucìmunyi kàtu ùlekela nànsha, nè mulekedi kàtu ùcimuna nànsha.” Anjì elàayibi meeji bwà cintu aci. “Mucìmunyi kàtu ùlekela nànsha, nè mulekedi kàtu ùcimuna nànsha.” Udi nè cyà kushààla kacya wakwàta. Kàdi kumpàlà mene kwà wèwè kubanga, ikàlà mutwìshìibwe wamba kuwà nè udi mubinge. Nè dībà adi ikàlà munànnùkile, kwitabikù bwà cintu nànsha cìmwè kukunyungishaci to. Tùngunukà. Ntu mupetè dilabula divùumvùke nè cyòci aci, nè nudi bamanyè nànkù. Ndi mumanyè cintu cìmwèpelè eci nè, paùdi mutwìshìibwe wamba kufwà nè udi mu diswa dyà Nzambì, paùdi mutwìshìibwe wamba kufwà nè udi mushindàmèene ku Kàlvaryò, kakwèna cintu nànsha cìmwè cyàkunyungishà to. Udi mwaba awu.

⁹⁴ Mukàjì mutekète ewu, ùvwa mwena Ngelikà, nè mwena Syrophénicie, nè wàkadi muumvwe bààkula bwà luumù lwà Yesù. Mpindyewu, diitabuuja dīdi dilwa munyi’s? Ku ditèeleja, ditèeleja dyà Dìyì. Yèyè wàkuumvwa bààkula bwà bwalu Bwendè. Nènku nudi bamanyè’s, yèyè’s ùvwa mufwànyine kwikala mupetè bintu byàbùngì byà bimupùmbisha, ku diikala mwena Ngelikà. “Diitabuuja dīdi difùma ku ditèeleja.” Aci tudi bamanyè. Nènku yèyè ùvwa nè—nè bintu byàbùngì byà kumupangisha, kàdi diitabuuja dīdi dipeta mushimi wùdi mukwàbò muntu nànsha ùmwè kàyì mumanyèpu kantu nànsha kàmwè to.

⁹⁵ Diitabuuja dīdi dipeta mushimi ewu wùdi muntu nànsha umwe kàyì mwà kuwùmvwija to. Ncintu kampàndà cyùdi mumanyè. Bakwàbò kabèèna mwà kucimòna to, kàdi diitabuuja dīdi dicimòna. Diitabuuja dīdi dimòna cyòci aci, mwaba wùdi dīsù dyà mubidi kadiyì dicimòna to. Kàdi dīsù dyà munda dīdi dimòna cintu aci.

Mpindyewu, ùvwa nè dijinga dyà Yesù. Yèyè ùvw- . . .

⁹⁶ Cintu cyà kumpàlà cidi cikèngela bwà wèwè kwenza, pawikala muswè kupeta Kilstò, bikèngela ùmanyè nè udi Nendè dijinga. Paùdi wela meeji nè kwèna ànu Nendè dijinga to, dībà adi kwàdyàkuMupetakù to, bwalu kwàkuMukèba nè lukunukunu to.

⁹⁷ Nuvwakù bamòne mwaba wùdi Mufundu mwambè nè: “Kèba neùpetè, kookòlà nebàkuunzùlwilè” anyi? Mu bushùwà bwà bwalu, aci kacyèna ànu dikòòkola to, bu mùdi [Mwanèètù Branham ùdi ùtuuta bintu pa cyambilu musangu wùmwè—Muf.], nè necikangudiibwè. Yèyè awu kènà ànu wàmba nè: “Èè, mvwa mupàtùke, Mukalenge. S’ki mèmè ewu. Udi naanyì dijinga anyi”? To, aci kī ncyòci to. “Ewu udi ukèbakeba, ewu udi ukòòkolakookola,” kacya byàngàtàngàne. [Mwanèètù Branham

ùdi ùtuuta bintu pa cyambilu misangu yàbùngì.] Bikèngela cìfwànanaganè nè mikwàbò Mifùndù.

⁹⁸ Mùvwà nzuji mubì nè mukàjì mukàmbà amu. Wàkakòòkola dībà dyònsò ku ciibi cyèndè. Ùvwa munànúkile. Yèyè mumubènge leelù ewu, mààlabà ùvwa cyàkàbìdì pa byanza byèndè.

⁹⁹ Ke mùshindù wùdì nè cyà kupeta Nzambì ngwôwò awu. Ikàla pa byanza Byèndè, dindà dyònsò, dilòlò dyònsò, ditùkù dyònsò, dībà dyònsò, byà munànunànu. Tùngunukà ànu nè kukèba, tùngunukà ànu nè kulòmba, tùngunukà ànu nè kukòòkola. Kùkookodi ànu katanci kakesè, nè kumbà kucyòka nè kukwàta njila kuya nànsha. Tùngunukà wèwè ànu nè kwimana mwaba awu nè: “Mukalenge, mmémè ewu, nè ncyàkuumuka to. Ndi pa byanza Byèbè mpindyewu. Nènshaalè ànu mwab’ewu. Udi mucyòka bwà kutèeleja anyi? Ndi munkaci mwà kucyònkómoka pàndì nkookola apa, bwalu ndi mumanyè nè Wèwè udi ulwa.” Amen. Ke dībà àdi didì cintu kampàndà cyènzeka’s. Ùdi nè cyà kukupàtula mu cyanza Cyèndè, nwamònu’s, pa nànkù Ùdi ùpàtuka bwà kukwandamuna. Mpindyewu, diitabuuja didì dipeta cyòci eci.

¹⁰⁰ Dìyì Dyèndè m’Mwele wà mvità. Bible ùdi wàmba, mu Ebèlù 4.12, nè: “Dìyì dyà Nzambì nditwè kutàmba mwelè wà mvità wà nseke yibidì.”

¹⁰¹ Mpindyewu, kùdi cintu ànu cìmwèpelè cìdì mwà kukwàta Mwelè wà mvità ewu. Ncyanza cyà diitabuuja. Cyanza cyà diitabuuja ke cintu cìmwèpelè cìdì mwà kupatula mwelè wà mvità wà diitabuuja ewu, mwelè wà mvità wà Dìyì. Mpindyewu, udi mufwànyine kwikala nè dibòkò dyà butekète, dikùmbàne ànu bwà kuwàmbulula bwà dibingishiibwa, udi nè butekète bwà dikèma. Pàmwàpa aci ke cyònsò cyùdì mwà kukòsa. Kàdi mwelè wà mvità wà Dìyì ewu newùkosè mulayì wònsò wàkafilà Nzambì mu Dyòdì awu, piikalàbu nè dibòkò dimpè dikolè dyà diitabuuja didì diwùkwàtemù. “Ndi ngiitabuuja Nzambì bwà dyondopiibwa dyànyì. Ndi ngiitabuuja Nzambì bwà dibàtiiza dyànyì.” Nzambì ngudi mufile mulayì, nè diitabuuja didì dikwàta Mwelè wà mvità ewu, nedìwùkòsè mu Lubwebwe mwàmwa. Mulayì wònsò wà Nzambì wùdì mwà kukòshiibwa cyanààna, ku Dìyì dyà Nzambì, bwalu m’Mwelè wà mvità.

Yèyè ùvwa nè bipùmbishi byàbùngì, kàdi diitabuuja dyèndè kadìvwakù naaci nànsha cìmwè to.

¹⁰² Udi mufwànyine kwikala nè bipùmbishi byàbùngì. Muntu yònsò udi uswa kutwilangana nè Kìlistò neàsanganè nè wèwè udi nè bipùmbishi byàbùngì, kàdi diitabuuja dyèbè kadìtu naabi to. Diitabuuja kadìtu nè cipùmbishi to. Diitabuuja ditu nè boyà mu cyàdì cyàdì, mapùndà manène menemene.

Dilukakaja dyà ngenyi didì dìjuuka kàdi kwamba nè: “Udi mumanyè’s, s’bidi byà lungènyi’s.”

103 Diitabuuja didi dīpingaja mapùndà ààdi awu paanyimà nè ditùntumika cyàdi cyàdi cinène aci, kàdi dyàmba nè: “Bwikilà mukana. Sòmbelà panshi.” Nè dilukakaja dyà lungènyi didi ditùpika diya mu ditumba nè dīsòmba panshi. Mmómò. Diitabuuja didi nè mapùndà, nè yèyè—yèyè ùdi ùswa kwamba cidiye wàmba aci.

104 Ke cidi citùkèngelà dilòlòlò edi ncyôci aci. Ke cidi cikèngela bwà èkèleeziyà wa Foursquare aci's. Ke cidi cikèngelà bwà musumbà wà beena Mpenta. Ke cidi cikèngelà bwà buloba bujimà. Ke cidi cinkèngelà. Ke cidi cikukèngela ncyôci aci. Nè bivwa bikèngela twètù kudyùmvwa bundù bwà kwitaba nànkù, kàdi bìdi bitùkèngela diitabuuja diikalà mwà kushààla dikwàte ku Dìyì dyà Nzambi nè kwamba nè Didi dilelèlè. Kutwilangana nè dyabùlù nè kwamba nè: “EMU MMÙDÌ MUKALENGE WÀMBA.”

105 Mvwa mbala ditùkù adi mwaba wùvwà muntu kampàndà mwambè nè dyabùlù wàkiimana kumpàlā kwèndè. Ke yèyè nè: “Úvwā ànu démon mukesè menemene wa kale, kàdi kwambayè nè: ‘Buu.’”

106 Yèyè nè: “Mémè kutupika kwalukila cyànyimà.” Ke yèyè nè: “Yèyè kwenza nè: ‘Buu.’ Mémè kutùpika kupingana cyànyimà. Musangu wònsò wùvwàye ùkungula nè: ‘Buu,’ nènku mvwa mwà kutùpika mpìngana cyànyimà, ùvwā wènda ùtàmba kudyunda nè mémè mvwa ntàmba kukèèpela.” Ke yèyè nè: “Kutùngunukayè nè kwenza nè: ‘Buu.’” Yèyè nè: “Mvwa mwà kwenda nshààla mukesè menemene musangu wònsò pàmvwà ngènda ntùpika mpìngana cyànyimà apu, nè yèyè ùvwā wènda ùtàmba kudyunda.”

107 Yèyè nè: “Mvwa mumanyè nè bivwa bikèngela bwà mémè kulwangana nendè, paanyimà pàà katanci.” Yèyè nè “Mémè kukènzakana, kudyàmbidila nè: ‘Cinyi?’ Mémè kusangana Dìyì dyà Nzambi.” Yèyè nè: “Mémè kudivùngila mu cianza cyànyì. Ke dyabùlù kwambayè nè: ‘Buu.’ Ke mémè nè: ‘Buu,’ wèwè pèèbè.” Ke yèyè nè: “Pangàākambà nè: ‘Buu,’ wèwè pèèbè, musangu wònsò wùmvwà ngàmba nè: ‘Buu,’ yèyè kwenda ùshààla mutàmbe bukesè nè mémè mvwa ntàmba kudyunda.” Ke cyôci aci. Bìkèngela ùlwanganè nendè mvità, nànsha ku tootooto nànsha ku ndandanda.

108 Nudi bamanyè's, bantu kabèèna biitabuuja nè kùtù dyabùlù to. Ntu ntwilangana nendè, dībà dyònsò, uh-huh, nsambakeena nendè ditùkù dyònsò. Mwena kwitabuuja kanà yònsò mukwàbò ewu ùtù wènda nànkù. Èyowà, bikèngela ùlwanganè nendè mvità, nànsha ku tootooto nànsha ku ndandanda, pa nànkù mbipiciibwe nè wèwè mubangè mpindyewu mene. Kùdi cintu ànu cimwèpelè cidiye ùciina, m'Mashi awu nè Dìyì adi. Diitabuuja didi diDilama. Ndikolè, didi dyènda ànu diyà.

109 Mpindyewu, tudi tusangana nè, mukàjì mukesè wa cyena Ngèlikà ewu, mungāmbi amu, ùvwa nè bipumbishi byābūngi, kadi diitabuuja dyèndè kadivwakù naabi to. Diitabuuja kaditu nè bipumbishi to. Bāvwa bafwānyine kwikala bamwambile nè: “Udi mumanyè nè udi mwena Ngèlikà anyi? Udi—udi—udi mwena Ngèlikà. Udi mumanyè’s, kwēna wa mu dingumba Dyèndè to. Kùyi kuntwaku kùdi musumbà awu to.”

110 Mpindyewu, ke cīmwe cyà ku bipumbishi ncyōci aci. Nwamònu anyi? Kadi wēwè nè diitabuuja, neūye, nānsa bishi. Aci kacayèna nè cidici cishintulula to, bwà nè ndingumba kaayi didi Ye ūsanganyiibwamù, cikolà Yikalè anumù.

111 Ûvwa nè dijinga. Ûvwa nè mwāna wa bakàjì uvwa upunga nè lufù mwikāle nè ciseki. Nēnku byākakēngela bwà kufikayè kùdiYe, bwalu bangāngābukà kabāvwa mwà kumwenzela cintu nānsa cīmwe to. Nānsa mpindyewu. Pa nānku bivwa bikēngela bwà kufikayè kùdi Yesù. Ūkaavwa muumvwè nè Yēyè ùvwa mwondōpe bintu bya mūshindù awu.

112 “Èè,” mwākambābo, “Yēyè, Yēyè kēna—Yēyè kēna... Yēyè kākālwakù nè ditābuluja Dyèndè kùdi māngumba ènù to.” Aci kacayākamupumbisha to. Mukàjì mukesè awu ùvwa nè diitabuuja. Ûvwa munanūkile. Yēyè wākāpita ànu musumbà awu. Diitabuuja dyèndè dyākamuumusha ku cyōci aci.

113 Kaa, bu bantu ànu mwà kwenza nānku leelù ewu’s wè! Muntu kampānda ùdi wamba nè: “Kùdi disangisha dilòlò edi lwà ku èkèleeziyà wa ku Foursquare aku.”

114 “Èè, kī ndyà mu dingumba dyènù to. Bikēngela ūshaale kule nè mwaba awu.”

115 Tūngunukà wēwè ànu nè kwenda kupita. Diitabuuja dyèbè didi dikutūngunuja. Nwamònu anyi? Diitabuuja kaditu nè cipumbishi nānsa. Dyōdì diyaaya, nānsa bishi. Kakwēna cintu nānsa cīmwe cyādīmanyikāku to. Bu mungambi, didi nè mapundà, mapundà mapāyāme. Ndikwāte cyalu; bikwābò byōnsò bìdi nè bōwà bwādì. Eyowà, mukalenge. NebiDinyeemè, bu mbālāngà. Bidi byūmuka ànu dyākāmwe. Kabyēnakù naaDì bwalu to, pādì diitabuuja dinēne dijuuka, dyāmba nè: “Ndi mumanyè ūndi mwitābūūje, nè ndi mutwishībwe.” Ke bwalu mbwabū.

116 Kūvwa kufwānyine kwikala kasūmbù kakwābò kāvwa kalwè, kāmba nè: “Matùkù à bishimà ākaadi mamanè kupita. Cintu bu nānku kacitukù to. Aci’s mmusumbà wà bansantu babūnguluki bāa mu malaba kuntu kwāka, beena Yudà abu. Twētù tudi beena Ngèlikà. Tudi nè meeji matwè. Tudi kasūmbù kàa bantu bāa lungenyi. Tudi tulongesha bāa pa buloba bujimà dimanya, mijiki, nè—nè ntēdeleelu. Kadi cintu pāaci nè ng’Aci kacitukù to.”

117 Kadi ùvwa munanūkile. Matùkù à bishimà kaāvwa mamanè kupita to, bwèndè yēyè, bwalu cintu kampānda cikaavwa

cimanè kumwambila, *mwab'ewu*, nè kabivwa nànkù to. Nè Yesù ùvwa nè civwà mukàji awu ukeba, nènku yèyè ùvwa mupàngàdike bwà kufika kùdìYe. Nànsha byôbì nè dīgumba dyèndè dyàkamutùdila mfrangà, anyì to, yèyè ùvwa munkaci mwà kuya, nànsha bishi. Yèyè's ùvwa nè cyà kupweka kuntwaku. Ùvwa munànikile, mutùngùnùke ànu nè kunànikila. Matùkù à bishimà's mmafwayine kwikala mapite bwàbò bôbò, kàdi kabivwa nànkù, bwèndè yèyè to. Ke mùshindù wùdìbì nànkù bwà mwena kwitabuuja yònsò ewu. Bantu abu bàdi bamba nè matùkù à bishimà. . .

118 Muntu kampàndà mmungambile, kùkaadi cikondo kampàndà, wàmba nè: “Cyùdì mufwayine kwamba nànsha ciikàle cinyì, Mukalenge Branham.” Yèyè nè: “Mémè ncyèna ngùitabuuja nè kùdì cintu pààci nè ndyondopa dyà kùdì Nzambì to.”

119 Mémè nè: “Bushùwà kacyènakù to, bwèbè wèwè. Kacivwa bwà beena bupidyà to. Ànu bwà aba bàdi bìitabuuja. Ncyà bushùwà. Kacyàkatùmiibwa kùdì beena bupidyà to. Civwa citùmina beena kwitabuuja. Kwèna mwà kuCisànkidila to, bwalu kwèna mumanyè kantu nànsha kàmwè pa Cyôci aci to.”

120 Ùvwa muswè kungambila nè: “Cintu pààci nè n'Nyumà Mwimpè kacivwakù to.”

121 Mémè nè: “Wèwè udi ànu mushààdile paanyimà nè bidimu bitwè ku makùmi àsàtù nè bisàtù, bwà kungambila aci.” Mémè nè: “Ndi mumanyè cidi cimpè. Nkàadi mumanè kuMwàkidila.”

“Kya, macimbu's wè!”

122 Mémè nè: “Mbifwayine kwikala nànkù, bwèbè wèwè, kàdi kî mbwànyì mémè to. Cidi cilelèlèlè bwànyì mémè. Cidi Mwoyi, cintu kampàndà ncyèle lwongò.” Mmulwè pashiishe bikolè bwà kucingambila.

123 Mbalwè dībà dimanè kupita bikolè bwà kutwàmbila bwà dyondopa dyà kùdì Nzambì. Tukàadi bamanè kwondopiibwa. Tukàadi bamanè kuujiibwa tètè nè Nyumà Mwimpè. Tukàadi bamanè kupeta ngàsà wa Dyambwibwa. Amen. Dībà ndimanè kupita bwà cyònsò cyà ku bintu abi. Cimpè cidibo bafwayine kwenza nkubwikila mukana mwàbò. Tukàadi bamanè kucipeta. Diitabuuja dyètù didi mwà kwamba nè: “Sòmba panshi. Mémè ndi mumanyè cindi ngàmba aci.”

“Èè, Docteur Kampà- . . .”

124 Cidi Docteur Kampàndà mwambè nànsha ciikàle cinyì, Bible ngudi mucyàmbè, nè mémè ndi nè diitabuuja mu Mukàndà wùdì mu cyanza cyànyì awu. Nènku diitabuuja dyànyì ndiCikwàte mwaba awu nè: “Yesù ùlwalwa. Ndi ngùitabuuja nè ndi mupetè Nyumà Mwimpè, bwalu ndi mMumòna nè mwoyi mu nsòmbelu wanyì.” Amen. Mbilondèshile Diyì. Cintu nànsha cimwè. . . Dibuulula dimwènèshiiibwe, dishindika dipwàngàne dyà Bible

nè mmulelèlè, nè Yesù Kilistò umweumwe awu makèèlèlè, leelù, too nè kashidi. Bàlekèlaayi bàseke cyòci aci. Bàdi mwà kuseka mwònsò mùdibo baswè amu. Twètù netwikale ànu banànikile mùvwàbò pàvwà Noà, pàvwà Mòsà, pàakajuukà batentudi bònsò abu.

125 Yane nè Yambèlè kwelabo dikombo dyàbò panshi, kwandamukadi nyòka. Kùvwa bantu abu, ànu bàakuneemekiiibwa nè mwàbò mwònsò, benzè ànu menemene cìvwà Nzambi mubàmbile bwà kwenza aci, nènku kulwakù musùmbà wà ditentula, kwelabò makombo àbò panshi. Cintu cìmwèpelè cìvwàbò mwà kwenza, kushààla ànu bapùwe bwà kumòna butùmbi bwà Nzambi. Amen.

126 Nzambi nèimanè ku luseke lwàci. PiikalaYè mukutùme, nè wèwè mutwishiiibwe bwà bwalu abu, neùkumbajè mudimu ùvwà Nzambi mudyànjiile kukulongolwela bwà wèwè kwenza. Newìmanè mwaba awu, nè Nzambi neùmushe mutentudi yònsò wa musunya ewu kùdi. Cyà bushùwà. Imànà mwaba awu. Udi mwà kwikala munànikile, bwalu udi mumanyè Ewu ùdi mwitàbùùje, nè cìdi cilelèlè. Kenkètà dibuulula dyèbè ku Dìyi. Dyòdi dibèngangana nè Dìyi, dilekèlè's. Dyòdi dipetangana nè Dìyi, Nzambi mmuswikiibwe, mwenzèjiibwe, bwà kushààla mukwàte ku Dìyi Dyèndè.

127 Mpindyewu, mpindyewu, kùvwa kufwànyine kwikala musùmbà wà bainàbànzà biimàne mu disangu amu, nudi bamanyè's. Ke bóbò kwamba nè: "Nyèyè awu ùlwa's. Mpindyewu nyèyè awu nè mwànà awu kuntu kwàka, wa bwalu awu nè ciseki's. Kàdi—kàdi Docteur *Kampàndà* mmwambè nè—nè kakwèna bwanga bwà dĩaamà dyà ciseki to. Kàdi's ke mukàji ewu, ùpweka mutàngile ku dingumba dyà cidimenèna didi kwínshì kwàka adi, bwà mupròfètà mukoleshi wa maalu awu kulwayè kaaba aka bwà kwondopa mwànà awu." Ke kwambabò nè: "Bìvwa bìkèngela twètù kwimanyika Susie." Ndi ntèkemena nè kakwèna Susie nànsha umwe kaaba aka to. "Kàdi bìvwa bìkèngela twètù kwimanyika Susie nè kumwambila, bwalu's yèyè ùtu mukàji mwìmpè. Kakwèna bwalu nànsha bùmwè mu nsòmbelu wendè to. Kàdi bìvwa bìkèngela bwà twètù kumwimanyika, nènku's ke cintu cìmwèpelè cìndi mumanyè mwà kwenza. Yèyè ukaadi mumane kupita, muntu mukwàbò yònsò, pa nàнку kàakusambukakù ewu mukàlu to.

128 "Udi mumanyè mùdi bwalu anyi, Susie? Bàyeebè's nèakulekèlè. Bwalu, yèyè's mmulubuludi anyi mulami mu kasùmbù kàà balami, nè yèyè nèakulekèlè, cyà bushùwà ànu menemene, wèwè muyè kuntwaku."

129 Ûcìvwa ànu munànikile. Wàkatùngunuka ànu nè kuya. Nwamònu anyi? Diitabuuja kadìtu dimanyè cipùmbishi nànsha cìmwè to. Didi nè cyà kufika kuntwaku.

130 Pashìishe kupitayè musùmbà mukwàbò wùvwà wàmba nè: “Udi mumanyè mùdì bwalu anyi? Pawàlukila, mufwishìibwe bundù, nè mujandùle nè kakwèna bwà nsongo to, bantu bònsò mu mutumba wèbè’s nebàkusekè.”

131 Aci kacyàkamusaamisha maci to. Ûvwa munànùkile. Wàkaya mutàngile ànu kumpàlà. Ntu muswè aci. Ntu muswè dinànukila dyà mùshindù awu.

132 Pashìishe ke umwe wa ku balami ewu mwimàne, wàmba nè: “Wèwè muyè kuntwaku, udi mumanyè cyènzàbo anyi? Nebàkupàtùlè mu èkèleeziyà wenù, bwalu udi mukadìsange nè bansantu babùnguluki bàà mu malaba abu, anyi bantu abu.” Ke yèyè nè: “Udi mumanyè’s...” Mfwilaayikù luse. Pàmwàpa kabivwa bikèngela kucyàmba to. Nwamònu anyi? “Wèwè mukadìsangè naabò, neùdiipàcishè mu èkèleeziyà webè amu’s.”

133 Ûcivwa ànu musùminyine. Diitabuuja kî ndimanyè dicimunyiibwa to. Ûvwa nè cintu cìmwèpelè cyà kukùmbaja, nè cìvwa cyà, kufika kùdì Yesù. Ûvwa nè dìjinga kampàndà, nè Yèyè ke Umwèpelè uvwa nè cìvwà dìjinga adi.

134 Ndi ngàmba nùnkù ewu dilòlò edi, mwanèètù wa balùme nè mwanèètù wa bakàjì. Mémè’s nkaadi nè bidimu makùmi àtaanu nè bisàtù. Ndi muMukwàcile mudimu kacya ngìkala nè bidimu bu makùmi àbìdì. Yèyè ùkaadi munkùmbàjile cintu cyònsò cìmvwà nkèngela. Kàdì pààkùmbana dìbà dyà lufù lwànyì, ndi mutwishìibwe nè cìndì njinga dìbà adi, mapwàpwà àbìdì bwà kufika dyàmwàmwa dyà musùlù, Yèyè neìkalàku. Kanùditàcishikù to. Ndi mumanyè nè Yèyè neìkalèku. Nengààluje mwelè wà mvità wà kale awu mu cìmànga, nè kuvùula cìfulu cyà mvità, kucitèeka kwìnshì ku musùlu, pangìkalà...ku mwelelu aku, pangùumvwà biici bàà mātu abu. Nènku nengeelè lubilà lukolè nè: “Tùmaayi bwàtù bwà disùngila. Ndi ngààlukila kumbèlu mu dindà emu.” Nebwìkalèku. Èyowà’s, mukalenge. Mùtootò wà mu Dindà newùpwekè nè newùkenkeshè njila awu. Dyàmwàmwa dyà musùlù netùye. Èyowà’s, mukalenge. Amen.

135 Ûvwa musùmìyine. Ûvwa nè kiipàcìlà kàà dikùmbaja. Ûvwa mumanyè nè bìvwa bikèngela kwìkalayè musùminyine bwà kufikayè kùdì Yesù, pa nànkù bìvwa bikèngela bwà yèyè kupicila ku bintu byònsò.

136 Ndekeelu wa byònsò, kufikayè. Mpindyewu, ndekeelu wa byònsò, kufikayè kaaba aka. Byònsò mbìmpè mpindyewu, nènku pashìishe ke cipùmbishi cikwàbò cilwalwà eci. Muntu mene uvwayè mwambè nè ke uvwayè mweyèmène awu, Muntu uvwayè ùteeta bwà kufika kùdìYe awu, Yesù. KwambaYè nè: “Mémè ncyèna mutùmìibwe kùdì cisà cyèbè to.” Kaa, èkèlekèlè! Aci kî ncifwànyinekù kutùfikisha twètù beena Mpenta ku ditaayika

anyi? Hmm! Hmm! Ekèlekèle! “Ncyèna mutùmìbwe kùdì cisà cyèbè to.” Yoyòyò! Aci’s civwa cìkùminà.

Kàdì nudi bamanyè mùdì bwalu anyi? Diitabuuja kì ndimanyè cìkùminà nànsha cìmwè to.

¹³⁷ Nè pashìshe, kàbìdì, KukùdimukaYè. Paanyimà pàà bintu byònsò bìvwàye mupicìlemù ebi, kàdì diitabuuja dyèndè ànu dikwàte, mu mùshindù wà nè ùvwa mumanyè nè Yesù ùvwa mwà kumupèesha dìjinga dyèndè. Nènku wàkapičila mu wònsò wà ku mikàlu ayi. Nènku pààkafikàye kùdìYe, ke kumubèngelayè, byà bibi nè: “Ncyèna mutùmìbwe kùdì cisà cyèbè nànsha.”

¹³⁸ Ndi mwà kudìfwànyikijila yèyè mwimàne mwaba awu, nè mèsù èndè àbàlakana. Yèyè—yèyè ùvwa kumpàlà Kwèndè dîbà adi. Ke cyònsò civwà cìkèngelà kwikalayè aci’s. Ke yèyè nè: “Pa kuumusha aci, cisà cyèbè cìdì ànu musùmbà wà tubwà twètù etu.” Kaa, ekèlekèle!

¹³⁹ Ambà tũng bu Wikala mukwambàci wèwè? Uvwa mufwànyine kwamba nè: “Nèngùùmushè mikàndà yànyì mu Foursquare emu bwà kuya mũngà mwaba. Ncyàkwàlukilàkù kàbìdì to kashidi. Nènyùmushè ku *Cikampàndà*.” Kaa, èyowà’s. Èyowà’s, mukalenge.

¹⁴⁰ Kàdì wàkashààla ànu kacya mukwàte. Kaa! Nwamònu anyi? Diitabuuja kaditù dimanyè dipangila to. Kakwèna cintu nànsha cìmwè cyàdìimanyikà to. Nànsha mwàkamwambilà Yesù, Yèyè mwinè wàkalwayè kùdìYe awu, wàmba nè: “Ncyèna mutùmìbwe kùdì cisà cyèbè to, nè bóbò biinè bàdì ànu musùmbà wà tubwà.” Yoyòyò! Kàdì ncinyi aci? Yèyè ùvwa mukwàte ku diitabuuja dilelèlè. Diitabuuja kaditù dimanyè dipangila to; nànsha dyòdì difùmìne penyì. Yèyè kì mmumanyè dicìmunyibwa to, bwalu ùvwa nè diitabuuja. Ùcìvwa ànu kacya wàkwàtakù. Kaa! Ndi munangè aci’s. Kàvwa cìkùnnyibwà citenteka to, cisopakaja, bu mùdì bàmwè bàà kùdìbo leelù ewu amu.

¹⁴¹ Ntèndeleelelu misopakaja yitùdì naayi leelù ewu eyi, nudi bamanyè’s. Kì mmìmpèku to. Byònsò mbisopakaja mpindyewu, bisopakaja. Nànsha mene bàdì nè èkèleeziyà misopakaja, beena Kilistò basopakaja, babwejamù ku dilabulangana dyà ku cyanza. Kaa, bàdì mwà kulwàta bìmpè, pàmwàpa bààkula Anglais mutàmbe bwîmpè, nè bikwàbò, mùshindù awu. Kaciyi nè mwoyi munda mwàci nànsha.

¹⁴² Udi wangata muvungu munène mulenga wà ditalà, disopakaja, pàmwàpa ndilenga misangu yìbìdì kutàmbe dikwàbò adi. Dikùnebì’s, nedifwe. Kadyèna nè mwoyi munda mwàdì to. Ncyà bushùwà.

¹⁴³ Katwèna baswè cintu cisopakaja nànsha cìmwè to. Tudi baswè cintu cishùwashùwàlè. Wèwè kùyì naaci to, shààla mwaba awu too nè pààlwàci. Bwà cinyi kwitaba mupinganyi pàdì maulu à Mpenta mùle tètè nè byà cyà bushùwà? Nwamònu anyi? Cintu nànsha cìmwè cyà cisopakaja, kacya kwimanakù to.

Udi nè cyà kwikala upwìdija manga ku cikùnyìibwa cisopakaja bwà kwipatakù twìshì.

¹⁴⁴ Ke mùshindù wùdìbì nè bàmwè bàà ku beena Kilistò basopakaja aba. Bikèngela bwà wèwè kubàsengeleela nè kubèngeleka, nè kubàlaya nè nebiikalè mulami anyi cintu kampàndà cìkwàbò, bwà kulama tùmwe twìshì twà maalu à pa buloba kule naabò, twà bupidyà. “Mbafwànyine kupàtuka mu èkèleeziyà.” Bèle pambèlu, nànsha bìshi. Ncyà bushùwà’s. Kacya kabàvwakù babwelèmù to.

¹⁴⁵ Kwèna mwà kushààla wa mu Èkèleeziyà kampàndà to. Udi mufwànyine kushààla wa mu diswa kampàndà. Udi mwà kashààla wa mu diswa dyà ba-Méthodistes, diswa dyà ba-Baptistes, anyi diswa dyà beena Mpenta. Kàdi wèwè ànu mulwè kùdi Kilistò, neùlediibwè mu Èkèleeziyà, ncyà bushùwà, Mubidi musokòme wà Kilistò. Bikwàbò mmaswa. Ncyà bushùwà. Àdi ànu mîmpè, ncyèna nè cîndì mfwila naabì to. Kàdi udi mulediibwe mu Èkèleeziyà wa Nzambi udi nè mwoyi, ku Nyumà wa Nzambi. Kwèna mwà kushààla wa ku Yèyè to, nànsha kakesè. Nènku paùdì ulediibwaMù, udi nè Dilediibwa.

¹⁴⁶ Kùcyena kàbìdì musopakaja to, ukashààlamù ku dilabulangana ku cyanza anyi mwimanyi wa apa nè pààpa to. Uh-huh. Nudi bamanyè’s, mwimanyi wa apa nè pààpa ùtu misangu yònsò ànu ùkwàta mudimu nè munu wèndè wà cyàlà. Ke mùshindù ngwòwò awu. “Èè, ndi mumanyè’s, kàdi Docteur *Kampàndà...*” To, to. Ke mùdìbì. Ke mùdìbì. Ke mùdìbì menemene.

Ùvwa munànukidi. Kàvwa musopakaja to. Kabìvwa bikèngela bwà wèwè kumupwìdijila bwanga bwà twìshì to, nè mánànanshì, kumulongolola. Yèyè ùvwa mwimàne mwaba awu.

¹⁴⁷ Citùpà cyà byà pa madimi byètù leelù ewu, byàbùngì byà ku byòbì abi mbisopakaja. Ànu cintu kampàndà bu mwàkambà David du Plessis, ngèèla meeji, musangu kampàndà kwambayè nè: “Nzambi kàtu nè biikùlù nànsha.”

¹⁴⁸ Lutàtu nè nkwa wa wetù wa beena Mpenta, tudi twenda tupeta biikùlù bàà cyena Mpenta. Bàdi bàbwela bwalu baataatù bèètù nè baamaamù bàvwa beena Mpenta. Tudi babāngàcile mu tulàalu twà bānà, nè bàdi bàkola kabàyi nè dilabula nànsha. Nè mwòmò amu bàdi bàmba mùdìbo beena Mpenta, bōbò pààbò. To, mukalenge. Nzambi kàtu nè biikùlù to. Yèyè kî nkaakù to; Yèyè n’Taātù. Cyà bushùwà. Bu wèwè mwà kubwela mu Dyulu, neùfutè mushinga bu mwàkafutà mamwèbè, bu mwàkafutà tatwèbè. Amen. Aci ncifwànyine kumvwika cipapè, kàdi’s m’Bulelèlà. Mmùshindù mupapè wà kuleeja bwalu, kàdi nudi nuumvwa Anglais yà mùshindù awu, ndi mutwìshìibwe. Kî ng’Anglais yà mîmpè menemene to. Cìdì cìfikisha bwalu, bùndì nteeta kwamba abu. Wèwè Citèèlèjà ànu cyanaànà. Èyowà’s.

149 Mukàjì awu kàvwa musopakaja to. Kabìvwa bikèngela bwà kwikalayè mumyamina manga to, nè mwengeleka mpindyewu, “Èè, mpindyewu, mwanèètù wa bakàjì munanga, ndi—ndi nkwambila, èè. . .” Kaa, to. To, mukalenge.

150 Nènku cìvwà cimubyànkùle panshì nànsha ciikàle cinyì, yèyè wàkamba nè: “Mbulelèlà. Katwèna cìngà cintu to ànu musùmbà wà tubwà. Mbulelèlà nè katwèna bacikùmbànyine to.” Kaa, ekèlekèle! Yèyè kwitaba nè Ûvwa mubingè.

151 Nèngiikàlè mwà kwamba dīyì dyà cìshìndaayi. Dilongòlolaayi. Musangu wònsò, diitabuuja dishùwashùwàlè nedìitabè nè Dīyì ndibingè. Nè dībà kanà dyònsò, cintu kampàndà cyòci cyàmba nè matùkù à bishimà àkaadi mapite, anyi cintu kampàndà cyà cibèngangana nè Bible, kì ndiitabuuja dishùwashùwàlè to. Diitabuuja nedìitabè bulelèlà misangu yònsò. Udi nè cyà kushààla nè Dīyì. Cìdì ní ncinyì cikwàbò cyàmba nànsha ciikàle cinyì, cìdì ní nganyì mukwàbò wàmba, Dīyì ke didì dyà cyà bushùwà. “Dīyì dyà muntu yònsò dīikalè mashimi, kàdì Dyànyì dilelèlà. Ewu yònsò wadidìnga kusàkìdilakù, anyi kuumushilakù awu, cintu cìmwècìmwè aci necyùmushiibwè cyà ku cyèndè citùpà ku Mukàndà wà Mwoyi.”

152 Nzambi neàlumbulwishilè bàà pa buloba ku èkèleeziyà kampàndà anyi? Ngwèpì awu? N’Kàtòlikè anyi? Màngumba nkàmà yisambòmbò nè makùmi àsambòmbò nè byà mu njila mashìilèshìilàngàne awu anyi? Mmuniyì mwàcyènzàYe?

153 Nzambi neàlumbulwishè bàà pa buloba ku Yesù Kilistò. Nè Kilistò: “Ku cibangidilu kwàkadi Dīyì, nè Dīyì dyàkadi nè Nzambi, nè Dīyì dyàkadi Nzambi. Nè Dīyì dyàkavwijibwa mubidi nè dyàkasòmbela munkaci mwètù.” Nzambi nè Dīyì ncintu cìmwè. *Eci* n’Nzambi pa mabèji mafundà ku cyamù.

154 Udi nè—udi nè Nyumà Mwímpè anyi? Kùnabì Dimiinu adi muntwamu. Didì dicifikisha ku Mwoyi, dipàtula Mwoyi awu, nè dìmwenesha nè diwùshindika. Yesù wàkamba, mu Yone Munsantu 12 nè: “Ewu udi ungiitabuuja Mèmè. . .” Yone Munsantu 14.12, èyowà’s wè: “Byenzedi bìNdi ngèza yèyè neàbyènzè pèndè.” Pa nànkù citu misangu yònsò ànu ciitaba Bulelèlà. Kaa, ekèlekèle!

155 Kàdì, nudi bamanyè’s, yèyè kwamba nè: “Aci’s ncilelèlà. Katwèna cìngà cintu to ànu musùmbà wà tubwà. Nè katwèna. . . Mu bushùwà bwà bwalu Wèwè kùvwa mutùtùmina to. Kàdì, Mukalenge, ncyèna nkèba dyàmpà dyònsò divwà naadi bânà adi to. Mèmè ndi ngenda ànu nkèbangana nè tusùnsukilà.” Kaa, ekèlekèle!

156 Nènku nudi numòna’s, bantu, bôbò mbaswè kupeta *cikampàndà*, kwondopiibwa, nè kupeta Nyumà Mwímpè mùshindù wùdìbò bèèla meeji nè bìvwa bikèngela kwikalabò nendè awu. “Mpindyewu, nèmpwekè, mwanèètù, bu wèwè mwà kuya naanyì mu cibambalu mwikalà muntu nànsha umwe kàyì

mwà kummònakù to, nè ùntentèkèlè byanza nè umbènèshè, nè ùteekè Nyumà Mwimpè munda mwànyì. Mémè nèncítàbè.” Kaa, to.

¹⁵⁷ Naamàna uvwa ujinga kwitaba dyondopa dyèndè mùshindù awu, musangu kampànda. Kàdi Eliyà wàkamwambila bwà kupàtukayè kuya kuntu kwàka mu Yadenà wa kale wa bitoci awu nè kudiinamù misangu mwandamutekète. Ndi ànu mwà kumumòna ùpàtuka mu dikalù dyèndè dya mvità adi. Kaa, muntu munène's, ùdikwàta ku dyùlù dyèndè. Ke yêyè ulwàlwa ewu, ùbwela mu màyi, wèndela ku nsongo yà bàna bàà nkàsà bu kampuusù mu musàbù, nudi bamanyè, ùpàtuka mùshindù *ewu*, nudi bamanyè's, ùpàtuka mùshindù *awu*, ùdiina mu màyi. Yêyè nè: “Kaa, ndi nkina bwà kwenza eci nunku,” ùzònzamamù. Bàmwè bantu batu bàlwa ku cyoshelu byenzè bu nè cìvwa bwalu bwà bùbèndesha ku mwoyi. Eyowà. “Kaa, ncyèna muswè kwenza nànkù to.”

Kudiinayè musangu ùmwè, pashiishe nè: “Kàdi pàànyì's ncìdi ànu nè nsudi.”

¹⁵⁸ “Mupròfètà mmwambè nè: ‘Misangu mwandamutekète.’” Cyà bushùwà. Too nè pààkatùmikilàyè Dìyì, mu kaabujimà! Too nè paùdi uCìtùmikila, mu kaabujimà! Ùvwa nè muntu mwimpè mwimàne ku mwelelu wà màyi aku, kwambayè nè: “Mupròfètà mmwambe nè: ‘Misangu mwandamutekète,’ taatù. Nwamònu anyi? Tùngunukà wèwè ànu nè kudiina mu màyi.”

¹⁵⁹ Ke cyòci aci. Wèwè kùyi mucipeta dilòòlò dyàkumpàlà to, dìnè cyàkàbìdì dilòòlò didì dilondà. Tùngunukà ànu too nè muwàpetà—muwàcipetà.

¹⁶⁰ Mpindyewu vùlukàayi. Mukàji mukesè ewu ùvwa, yêyè's ùvwa bu mwàkadì Laahàbà ndumbà awu. Kacya kàvwakù mwànji kumòna cishimà to. Yêyè ùvwa ànu muumvwè bààkula bwà cishimà. Ncinyi cìikalàyè mu ditùkù mu . . . cìikalàyè mwà kutwènzela mu Ditùkù dya Cilumbulwidi? Kacya kàvwakù mwànji kumòna cishimà to. Ùvwa wa bàà Bisàmbà byà bendè. Kacya kàvwakù mwànji kumòna to, kàdi ùkaavwakù muumvwè bàmba. Kàdi twètù tudi bamòne nè buumvwè, cikòlà baciikàle ànu twela mpatà. Kaa, ekèlekèlè!

¹⁶¹ Ùvwa bu Laahàbà ndumbà awu. Pààkalwà batentekedi abu, kabyàkakèngela bwà yêyè kwamba nè: “Nènnwambilè. Nulwe nè Yoshùwà mwab'ewu bwà àngenzèlèku disangisha, nènkù nèmmonè mùshindù wùdiye ùsààmuna nsukì yèndè, nè mùshindù ùdiye wàkula, tunungu twà bùkàlàngà tùdiye ùkwàta naatù mudimu ku cyambilu. Nènkù nèmmonè ní ndi mwà kumwitaba anyi to.” Yêyè nè: “Mvwa mùmvwè nè Nzambì wa mu Dyulu ùvwa neenù, nè cintu cimwèpelè cìndì ndomba ncyà kupàndishiibwa.” Ki bwalu mbwòbù abu's.

¹⁶² Mukàji mutekète awu ùvwa bulelèlè munànkidi. Wàkatùngunuka ànu buludì. “Ànu kumpàndisha cyanààna.

Nêngenzè cyònsò cinùdi baswè bwà mémè kwenza aci.” Kaa, s’ki bwalu mbwòbù abu. Ki cyôci aci.

¹⁶³ Mukàji mukesè ewu, nànsha lutàtu lwôlù lwikàle bìshi, yèyè ùvwa munànùkile. Kaa! Ùvwa museemènè mu mùshindù mujaalàme ku dipà dyà Nzambi. Ùvwa nè diseemena dijaalàme, didipwekesha. Wàkadishinda ku makàsà Èndè, nè ùvwa nè didipwekesha. Yèyè kàakajuukaku kuulu, wàmba nè: “Mpindyewu, Wèwè anji indilàbi kakesè tǔng. Udi mumanyè nè twètù aba tudi beena Ngèlikà. Udi wamba mutùvwà tubwà. Anji indilà katanci mwab’ewu, Mukalenge. Udi mujingùlùle nè tudi—tudi baampilù mu mamanya, nè twètù tudi baampilù mu *cikampàndà* nè *cikansanga* anyi?” Kàakeelaku meeji ku aci to, nànsha kakesè. Wàkiitaba ànu nè Yèyè ùvwa mubingè, nè kupòna ku makàsà Èndè, nè kwamba nè: “Nkwàcishèku, Mukalenge. Nèndye ànu tusùnsukilà atu. Pìikala mwanàànyì wa bakàji kàyì mwà kupeta cipepe cijimà cyà dyàmpà, Udi ku mwà kumupeteshakù tusùnsukilà atu anyi, pìikalàye mbwa?” Kaa, ekèlekèle! S’ki bwalu mbwòbù abu.

¹⁶⁴ Tudikù mwà kusànkishiibwa ànu nè tusùnsukilà anyi, bu Nyumà Mwimpè mwà kusokolwela muntu kampàndà dilòòlò edi nè: “Udi mwondòpiibwe?” Udi mwà kwikala mudilongolole ànu bwà kwangata tusùnsukilà atu, anyi udi mwà kuswa bwà Nzambi kuseemenaYè nè kukubàndisha nè kukupèsha njiyà yà mùshindù kampàndà anyi? Bu Yèyè ànu mwà kwamba munda mwà mwoyi wèbè nè: “Bubèèdi bwànyì mbujikè. Kùcyenà kàbìdi naabù to. Ndi ngiitabuuja nè nèngondopiibwè, kubangila ànu ku dilòòlò edi,” udikù mwà kwangata tusùnsukilà atu anyi? Anyi, udi mwà kuswà bwà bantu bònsò kulwabò kukutentekela byanza, nè kukupòngolwelabò maanyì, nè kupicila mu mishingà yà ciibidilu mùshindù awu, anyi udi ukèba wèwè ànu tusùnsukilà? Nzambi nèaneemekè cintu aci.

¹⁶⁵ Nudi bamanyè’s, bààbùngì bàà ku bayiidi bààkaMumòna paanyimà pàà dibìkà Dyèndè dyà ku lufù. Tomààsè wákamba nè: “To, huh-uh, mémè ncyàkuciitabuujakù to. Bikèngela ngèlè—ngèlè byanza mu bibangu, byà misonso Yèndè mu byanza Byèndè nè mu lubadi Lwèndè. Dìbà adi nèncitabùujè.”

¹⁶⁶ Yèyè nè: “Lwàkù apa, Tomààsè.” Yèyè nè: “Ndengàaku.” Nè yèyè kuMulengayè;

Yèyè nè: “Mukalenge wanyì, nè Nzambi wanyì.”

¹⁶⁷ KwambaYè nè: “Toomààsè, bwalu wàmònu nè ùmvù, nè bikwàbò byònsò, wàshìshi kwitabuuja’s.”

“Èyowà’s, Mukalenge.”

¹⁶⁸ Yèyè nè: “Ndifutu ditàmbe bunène kaayi didiku, bwà bàdi kacya kabàyiku bânji kumòna kàdi bàMwitabuuja’s!”

169 Tudi pabwîpî anyî? Tudi bàà Bisàmbà byà bendè bu mukàjì wa bàà Bisàmbà byà bendè awu anyî? Yèyè wàkadì cileejilu kutùdì twètù bônso nè: “Mpèèsheku ànu tusùnsukilà atu, Mukalenge” anyî? Ngǎnjì ànu kuumvwa muntu kampàndà: “Kacya ncìtukù mwànji kubala Dîyì to, kàdì ngambilèku nè Wèwè udi wondopa babèèdì. Kasùnsukilà aku nekìikalè kakùmbàne bwànyì mèmè. Ndi ncìtabuuja. Ndekèlaayi ngumvwè muntu kampàndà wàmba, nè ùcìbadila mu Dîyì, nè Nyumà Mwímpè...”

170 Peetèlò wàkamba, mu Ditùkù dyà Mpenta nè: “Nyingàlàayi, muntu nè muntu wa kunùdì, nùbatiijiibwè mu Dîná dyà Yesù Kilistò bwà dilekelediibwa dyà mpèkaatù yènù, nènkù nenùpetè kupà kwà Nyumà Mwímpè. Bwalu mulayì wùdì kunùdì, nè kùdì bàna bèènù balela, nè kùdì aba bàdì kule menemene, mu búngì bwónso bwàbiikilàbo kùdì Mukalenge Nzambì wetù abu.”

171 “Mukalenge, ndi ndyùmvwa nè aci ncyà bushùwà.” Aci’s nkasùnsukilà. Lwàkù. Ke cyónso cidì cikèngelà bwà wèwè kwenza. Lwàkù.

172 Tukàadi badìlongòlòle bwà kwangata tusùnsukilà anyî? Tudi badìlongòlòle bwà kudipwekesha anyî? Ke civwàye. Úvwa mudìlongòlòle bwà kudipwekesha. Diitabuuja dùtu misangu yónso ànu diitaba Dîyì nè ndilèlèlè. Diitabuuja dùtu misangu yónso ànu dìdipwekesha. Diitabuuja dùtu didipwekesha. Mpindyewu, yèyè úvwa wènda ùkèbangana ànu nè tusùnsukilà atu.

173 Tàngilàayi nùmonè cyàkambà Yesù. “Bwà edi dîyì, bwà edi dîyì dyà nè: ‘Ndi muswè kwangata tusùnsukilà, Mukalenge.’ Bwà dîyì edi, mwanèbè wàsàngadi. Udi nè dilòmbà dyèbè bwalu udi wìtabuuja.”

174 Diitabuuja dìdì diitaba nè Dîyì dyà Nzambì ndyà cyà bushùwà. Diitabuuja dìdì diitaba bintu byónso ebi.

175 Martà, Màriyà; mu Bible mujimà tudi bafwànyine kutèèla bàabúngì; mukàjì wa beena Shunèmà. Bintu byàbúngì nè maalu atùdì bafwànyine kutèèla. Katwèna nè díbà to. Mu cyòci eci, ndi nè mabèji matwè ku àtaanu mwab’ewu, mafùnda à bantu, mpindyewu, bààkalwà bwà tusùnsukilà. Kàdì twànji kulekela aci bwà katanci kakesè cyanàànà. Ndi ngùmvwà Nyumà Mwímpè pabwîpî. Ncyèna ngèèla meeji nè bidi nè mushinga to.

176 Lekèlaayi nnùpèèshèku ànu kaadilabula kakesè kàmwèpelè. Beena Kantu-ku-byanza bààkafùnda kaacintu kakesè aku muntwamu, kaabwalu kakesè aku ànu àbìdì àdì panshì aa, mu cikàndàkàndà cyàbò amu. Nènkù vùlukàayi, paùdì utangalaja cintu cifùnda ku cyamu, mbímpè bwà kwikala mukùmbàne bwà kucitwa mpàndà. Tudi naadi, dîyì difùnda dyà kùdì ngàngàbukà.

Ndi mmòna, mu èkèleeziyà dilòòlò edi, bantu bavùumvùke bàà cyena Espagne.

¹⁷⁷ Mwva nsanganyibwa mu Mexico City, nènku tuvwa twenza disangisha dyà butumbi. Mwva kuntwaku malòòlò bu àsàtù nànkú awu. Kàdi kùvwa muntu ùmvwà mbìikila nè Mààlabà. Ùvwa nè cyà kungangata pa díbà ìsambòmbò jaajaaja, nè ùvwa mwà kungangata lwà pa díbà citèemà. Nè mvwa misangu yònsò ànu, bwalu ùvwa nè lujòòkò be, mvwa ngàmba nè yèyè ùvwa “mààlabà.” Nwamònu anyi? Nènku patwàkapàtuka mu cijèngù cinène cìmvwà nyiishilamù aci, bàvwa nè cyà kumbàndishila pa cibàndilu kuulu eku, pashìishe kumpwekeshila ku myonji, pa cibumbà cyà ku cyambilu apu.

¹⁷⁸ Dilòòlò divwà didyànjlè adi, kùvwa muntu wa beena Mexique uvwa mulwè mu disangisha amu. Ke mukùlumpè awu, mvùla ùlòka, muvwàye ùlòka amu's, ke kulwayè pa cibumbà cyà ku cyambilu apu, mpofu. Nènku kulwayè. Mémè kutàngila. Mwva muvwàle bisàbaatà bimpè, nè nkooci mwimpè. Nènku mukùlumpè mukwàte nè byà luse awu, ùvwa ku makàsà kutupù, nè mupanù wèndè wònsò musùnsùke. Kàdi ndi nnwàmbila nè mwandamunyi wanyì ùvwa nganyì, nwènù nudi bamumanyè; Mwanèètù Espinosa, wa mu Sacramento emu, mu Californie emu, mwanèètù wa beena Mpenta. Ùvwa wàndamuna. Tuvwa, mu malòòlò àbìdì awu, ngèèla meeji bapetè bantu batwè ku binunu makùmi àsàtù anyi makùmi ànaayi bàvwa bakùdimùne mucima buumùke ku cyena Kàtòlikè, balwe ku bwena Kilistò nè Nyumà Mwimpè.

¹⁷⁹ Ke mpofu mukùlākājì ewu kupicilayè pa cibumbà cyà ku cyambilu apu. Kàdi wèwè kùyì muditèeka pa kaaba kà bantu baùdì usambidila abu to, kabyèna bikèngela nànsha kubàsambidila to. Bikèngela wèwè mwìnè kuditèeka pa kaaba kààbò. Ke mémè kudyàmbidila nè: “Bu taatù wanyì mununu awu muciiikàle nè mwoyi, ùvwa mwà kwikala nè mvùla yìpacila yà mukùlumpe awu. Nyèyè ewu. Kèna nè bisàbaatà to.” Nè yèyè mwìnè kàvwa nè mutèèlù pambidi to. Nkooci wa kale, musùnsùke, mwikàle nè lupwishì; cifulu cyà kale mu cyanza cyèndè, citelakaja nè nshinga. Pàmwāpa mununu awu kàvwa kacya mupete cyākudyà cimpè kacya bààmulela. Nè pashìishe mùshindù mwìnè wùvwa myanda nè lwonji kùdiye, ke yèyè ewu wènda ùtètuka mu bufofo. Mèsù èndè àvwa matòòke.

¹⁸⁰ Mémè kutàngila mukùlumpè awu, nè mémè—mémè kumwela mabòko ku nshingù. Nènku Mwanèètù Espinosa kàvwa mwà kwandamuna disambila adi to. Mémè—mémè kwamba nè: “Taàtù wa mu Dyulu, bu mémè mwà kumupèèshakù bisàbaatà byànyì ebi, nùnkù's ndi mumuvùdilabi mu mùshindù wà muntu nànsha umwe kàyikù mwà kubimòna to, mumupèèshè nkooci wanyì ewu, mumutùmè mu njila. Kàdi yèyè mmunène muntàmbe. Kàdi, Nzambi, muumvwilèku luse. Mupèèshilùlè lumònù lwèndè.”

¹⁸¹ Kwelayè lubilà nè: “Gloria a Dios.” Mémè kukenzakana. Yèyè’s ùvwa mwà kumòna bîmpè ànu bu mémè kùnu.

¹⁸² Dilòlò dyàkalondà kùvwa citàmba cijimà, anyi mushiki wà bilàmbà, ànu mùdi bule bwà nzùbu ewu, mushiki wipacila butùmbùke bu *ebu*, kàmùyi cingà cintu to ànu bitàmbalà byà kale nè bilàmbà byà kale bisùnsùke.

¹⁸³ Maalu à mpetu à mu Mexique mmatàmbe kulandika be. Pàmwāpa Pedro ùdi ùpeta... yèyè’s mmwibaki wa nzùbù yà madyòtò, mmufwànyine kupeta pesos dikùmi nè yisambòmbò ku ditùkù. Kàdi nebikèngèlè mudimu wà matùkù ànaayi bwà kудisùmbila mukòlò wà bisàbaatà. Kàdi nèbimukèngèlè bwà yèyè kulama ndambù wa mfrangà mu yôyi ayi bwà kusumba, pesos yàbùngì, bwà kàndeyi kàà kuteemeshila pa cyàltàr cyà ngòlò cyà cìyiila ndola mùliyò mujimà bwà mpèkaatù yèndè. Ke cidi cingosha ncyôci aci.

¹⁸⁴ Pa kumòna bantu bàà mushinga mukolè abu, bàlwa kuntwaku pa dîbà citèemà jaajaaja wa dindà. Kabàyi nè nkwasà to, bwà kusòmbapù. Bàvwa beeyèmèngàngàne ewu nè mukwèndè, bu mikòòkò mu mpàta. Mvùla munkaci mwà kulòka! Bakàji abu, biimàne kuulu, nsuki yàbò milembèlèlè, yizònta màyi, bindile ditùkù dijimà mu muunya wà luuyà lukolè anyi mvùla, ànu bwà kutèeleja Dìyi dyà Nzambi. Kaa, nebènzè cinyi pààjuukà Phoenix mu Ditùkù dyà Cilumbulwidi pàmwè naabò, mpàdi, èkèleeziyà milenga yisanganyibwa myaba yònsò, kàdi kanùyi nànsa mwà kubàbweja munda’s?

Ke mukàji awu mwimàne kuulu, anyi mulùme awu mwimàne kuulu, èyowà’s, nè lùmònu lwèndè.

¹⁸⁵ Dilòlò adi pangàakabwelà, mvùla ùvwa munkaci mwà kulòka bikolè. Mwanèètù Jack Moore, bààbùngì bàà kunùdi mbamumanyè, Mwanèètù Espinosa, bààbùngì bàà ku bàna bèètù, bàvwa pa cibùmbà cyà ku cyambilu apu. Nènkù Billy, mwanàànyì wa balùme, ùtu pa ciibidilu wàbanya twartà twà disambila. Kàdi yèyè kàvwa mwà kwakula ci-Espagnol nè bantu abu to, nànkù byàkakèngela bwà kulekelayè Maaalabà ùcyènta’s. Kàdi ùvwa ànu wènda ùnyùnguluka bwà kumòna nè Maaalabà kàvwa ùsùmbisha kartà kàà disambila to. Pa nànkù ke mwaba wùdi wùkèngela bwà twètù kutàbaleela awu, nudi bamanyè’s, ku disùmbisha dyà kartà kàà disambila. Pa nànkù yèyè kumutàngila ànu cyanààna, nènkù bàvwa mwà kubànda, nè kutàngila nè kumòna nè yèyè ùdi ànu ùpèesha *Kampànda* kartà kàà disambila, mùshindù awu. Pa nànkù kwambayè...

¹⁸⁶ Kulwayè kùndi, mémè mvwa munkaci mwà kuyiisha. Mushiki munène wà—wà bilàmbà byungwija mwaba awu. Mùshindù mwine wùvwàbo bamanya nè ebi bìvwa byà nganyì, ncyèna mumanyè to. Pa nànkù bàvwa... Mémè mvwa ànu muditwe mu dyakula, ke Billy kuntuutayè cyanza pa dikaaya. Yèyè nè: “Papa, nebikèngele bwà wèwè kwenzaku cintu

kampàndà, bwà mukàji mukesè udi pambèlù pààpa wàwa.” Yêyè nè: “Ndi nè baawisiyè batwè ku nkàmà yisàtù, nè kabèèna nànsha mwà kumutwisha panshi to.” Kànà kàà bakàji kakesè kàà cyena Espagne, kùipacila bule *ebu*, kalenga kumòna’s, kàvwa nè mwànà mufwè mu byanza byàkù, mubwikila mu mbùlankète. Ke yêyè nè: “Mààlabà mmwabanye twartà tònso twà disambila.” Ke yêyè nè: “Kèna nè kartà kàà disambila to. Kàdi’s ke mulongo ngwòwù awu, kacya ànu wàshààla mwimàne, bwàbò bóbò kuntwaku, munda mwà mèbà àbidi à ndekeelu aa, bakwindile wèwè, bwà kulwa.” Ke yêyè nè: “Mmuswè kulwa nè mwànà mufwè awu kaaba aka, kàdi twètù katwèna mwà kumukwàta to.”

¹⁸⁷ Kaa, èè, yêyè’s ùvwa mufwànyine ànu kubànda pamutù pàà baawisiyè abu, kubwela lùbilu mwínshì mwà makàsà àbò, anyì ní ncinyi cyònsò. Ùvwa munànùkile. Ùvwa muswè kufika kuntwaku. Ùvwa mumòne muntu mpofò awu mwondopiibwe, dilòòlò òvwa didyànjlè adi. Ùvwa munànùkile.

¹⁸⁸ Mèmè nè: “Mwanèètù Moore, mukàji ewu kî mmumanyè nè mèmè ndi nganyì to. Kî mmumanyè nè kampàndà ngwèpi to. Wèwè pweka ànu kuntwaku ùsambidile mwànà awu. Aci’s necikosè bwalu. Yêyè. . .”

Yêyè nè: “Èyo, Mwanèètù Branham.”

¹⁸⁹ Pa nàнку ke Billy kumukwàtayè ku dibòko, byenze ànu bu nè mmèmè, pa nàнку kutùùlukayè pa cibumbà apu. Mèmè kukùdimuka. Mèmè kwamba nè: “Ndi nè disànkà dyàbùngi dyà kwikala kaaba aka dilòòlò edi.” Nè masangisha kaèna meenyi kunùdi nwènù bantu bàà mu Phoenix emu to. Dyàkàmwè ànu kumpàlà kwànyì aku mèmè kumòna mwànà mukesè wa mu dibòko wa beena Mexique, kàyì nè mènù to, ùseka, mu cikèèna-kumòna musòmbe kaaba aka. Mèmè nè: “Anji indilà kakesè. Anji indilà kakesè, Mwanèètù Espinosa. Ndà kùdi. . .”

“Mbishi’s—bwalu bùdi bìshi’s?”

¹⁹⁰ Mèmè nè: “Fikà ku cikòkokolo.” Mèmè nè: “Mwambilè àlwe mwab’ewu.”

¹⁹¹ Yêyè nè: “Papa,” Billy nè, “kwèna mwà kumupìcisha pa twartà twònsò twà disambila atu to.”

Mèmè nè: “Lwâyì nendè kaaba aka. Ndi mfùma ku dimòna cikèèna-kumòna.”

¹⁹² Pa nàнку, kumubiikilayè. Ke kwalukilabò. Ke yêyè ulwàlwa ewu, nè cilàmbà cikùta mu cyanza, nùнку ewu. Nè mwànà mukesè wa mu dibòko mulààle muntwamu, mufwè kwambwila ku dindà aku, mufwè nè disaamà dyà bisùlusulu, kalùmyànà kakesè kàà bule *ebu*. Ke yêyè ulwàlwa ewu, binsònji bimupwekela pa matàma, twisù twèndè tukesè tufiike atu, nsukì yèndè milembèlèlè, inàbànzà mukesè mwimpè kumòna.

Kubàndayè pa cibùmbà cyà ku cyambilu apu lubilu nè kutwàye binù, è kubangayè kudila mwadi nè: “Taatù!”

Mémè nè: “Juuka, ànu katanci kakesè cyaààà.”

¹⁹³ Mémè kudyàmbidila nè: “Mukalenge, kàdi bu kaciyi cyôci aci? Apu ni ki ncyôci aci? Ncyèna mumanyè. Mémè ndi mumòne ànu mwànà mukesè wa cyena Mexique, mutekète, kàyi nè ménù, binyàngànyàngà byèndè bikesè. Mwikàle ùnsekeshà, musòmbe ànu mwaba *awu*.”

¹⁹⁴ Nènku ùvwa munkaci mwà kudila mwadi. Ke mémè kutèeka cyanza cyànyì pa mbùlankètè uvwa mubolè awu apu, nè mvùla munkaci mwà kulòka díbà adi. Mémè kwamba nè: “Taatù wa mu Dyulu, mukàji mukesè ewu, Ncyèna nè mpatà to mu meeji àànyì nè Wèwè udi munkaci mwà kumwandamuna.” Mémè nè: “Ndi mumòne cikeenà-kumòna, cyùdi Wèwè mumanyè nè mbulelela, cyà mwànà mukesè wa mu dibòko. Ndi ànu ncitaba ku diitabuujà nè mmwànà ewu. Ncyèna mumanyè mukàji awu anyi mwànà wa mu dibòko to. Kàdi, cintu kampàndà, Wèwè udi ukwàta mudimu ku ntengu yònsò yibidi.” Mémè kumutentekela byanza. Nènku pangàkamutentekela byanza, yèyè kusubakana è kwelayè lubilà lukolè ànu nè mwèndè mwònsò. Maamù kumuumushayè mbùlankètè pambidi, nènku ke yèyè awu's, nè mwoyi, mu mabòkò èndè.

¹⁹⁵ Mémè kwamba nè: “Mwanèètù Espinosa, kùfùndikù aci to, kàdi tùmakù muntu kampàndà mwimpè wa lulamatu.” Nè yèyè mukàji ewu ùvwa ùcyàmba mu cyena Mexique, ngàngàbukà awu ùvwa mwambè nè mwànà wa mu dibòko awu mmufwè, nè disaamà dyà bisùlùsùlù bipàte, mu dindà adi lwà pa díbà mwandamukùlù anyi citèemà jaajaaja. Kàdi's ke yèyè ewu paanyimà pàà díbà dikùmi, dilòòlò adi. Ke mémè kwamba nè: “Tùma diyi ùpetà mèyi màfùnda, mukàndà mufùnda kùdi ngàngàbukà, uvwa mwambè nè mmufwè awu.”

¹⁹⁶ Ke ngàngàbukà wa beena Mexique kufùndayè diyi kampàndà nè kuditwayè cyàlà, “Mémè nguvwa mujikule nè mwànà awu mmufwè, kakùyì mweyelu anyi cintu nànsha cimwè to, mu birò byànyì mu dindà emu pa díbà citèemà jaajaaja.”

¹⁹⁷ Kàdi's ke yèyè ewu, pa díbà dikùmi jaajaaja dilòòlò adi. Kàdi pààkacyàbu mu dindà, mwànà awu ùvwa mu birò byà ngàngàbukà bwà kumwenza mateeta kwamba nè: “Ànu bu pa ciibidilu, cyàkàbidi.” Bwa cinyi? Bwalu mukàji mutekète awu ùvwa munànùkile.

¹⁹⁸ Diitabuujà kaditu dimanyè dicimunyiibwa nànsha. Kwòkò kwimàne bantu binunu bitaanu mwaba awu, cintu nànsha cimwè kacyèna mwà kwangata kaaba to. Èkèleeziyà wèndè ùvwa mwà kumwipata, beena mutumba bèndè bàvwa mwà kuseka. Kàdi Nzambi uvwa mwà kutàbeeja mèsù à muntu mpofo, dilòòlò divwà didyànjlile, uvwa mwà kubiisha mwanèndè awu, bwalu

Yêyê ùdi Nzambi umweumwe awu makèèlèlà, leelù, too nè kashidi.

¹⁹⁹ Nènku piikalà kasùmbù kàà bantu kàdi mwab'ewu dilòòlò edi aka, kà bakèbi bàà bisùnsùkila, panwikalà nudi nànkù; ànu Nzambi mwinè udi mukufikishe kaaba aka awu, udi mwà kukulombola ku mwaba wà mùshindù ewu awu, Nzambi wàkakusungila awu, Nzambi uvwa mwà kukuuja nè Nyumà Mwímpè awu; Nzambi umweumwe awu ùdi mwà kukùpula kantu nè kantu kàà bubèèdi nè tunyinganyinga, nànsha cyòci ciikàle cinyi, mu myoyi yènù dilòòlò edi, cwenù biitabùuje nànkù. Munànùkile, musùminyine, olòla cyanza nè kwàta kasùnsukilà kàà diitabuuja aku mpindyewu, wamba nè: “Mukalenge, twasàkidila bwà bwalu abu. Ke mèmè ulwàlwa ewu.”

Mwena mutumba neāmbè màalabà nè: “Kwèna mwondòpiibwe to.”

²⁰⁰ Wèwè udi wamba nè: “Kaa, kàdi's ndi mondòpiibwe. Ndi mondòpiibwe. Ndi mupetè kasùnsukilà makèèlèlà dilòòlò awu ku èkèleeziyà wa Foursquare awu. Cintu kampàndà kwelaci lwongò munda mwànyì. Cintu nànsha cimwè kacýakungiimanyika kàbidi to. Mèmè ndi naaci.”

Twinyikàayi mitù yètù bwà katanci kakesè cyanàànà.

²⁰¹ Udi dijinga nè kasùnsukilà dilòòlò edi anyi? Udikù mwà kwangata kasùnsukilà nè kwikala munànùkile naakù anyi?

²⁰² Kasùnsukilà kakesè kàà diitabuuja kàdi kalwè kùdi mukàji mu—mukèsè, wa bàà Bisàmbà byà Bendè wa cyena Ngèlikà, uvwa kacya kàyi mumòne cishimà kacya bààmulela to, mumpàngaanù mukuukwidi wa mpingù, kàdi ùvwa muumvwè nè cívwa cikwàtè mudimu pa muntu kampàndà mukwàbò. Kàvwa mwànji kucimònakù kacya, kàdi wàkaciitabuuja. Nè dyediibwa dyònsò dyà màyi ku makàsà divwàye naadi adi, nànsha nànkù, mwimànyine pa cintu kampàndà munda mwà mwoyi wèndè cimwambila nè mwanèndè awu ùvwa mwà kwondopiibwa, nudi bamanyè's, pààkafikàye kumbèlu wàkasangana mwanèndè wa bakàji mulààle pa bulààlù. Disaamà adi kumushiyadi. Kabìyi ànu bwèndè yêyè nkààyèndè to, kàdi bwà mwanèndè wa bakàji uvwa kàyipù awu.

²⁰³ Udi dijinga nè kasùnsukilà dilòòlò edi anyi? Pawikalà naadi, swàkù wèlè ànu cyanza cyèbè muulu cyanàànà. Nè kwamba nè: “Mukalenge, ànu kasùnsukilà kàmwè ke kàndi ndòmba.”

²⁰⁴ Éyi Taatù wa mu Dyulu, tàngilàku bàà Bisàmbà byà bendè bàdi bàkèbangana nè tusùnsukila abu. Bikondo kí mbishintùlùke to, Mukalenge. Mbumvwe. Mbumvwe nè Wèwè udi wondopa babèèdi. Mbúmè nè Wèwè Udi uuja nè Nyumà Mwímpè. Udi ufila diikisha kùdi bàdi bacyòke. Kaa Nzambi, enzàku nè aba bàdi kaaba aka dilòòlò edi munkaci mwà kwela mbilà bu mùvwà inábànzá mukèsè wa mushinga mukolè awu

wa kùkaadi bidimu byàbûngi nè: “Mukalenge, ncyà bushùwà nè katwèna bakumbànyine bwà kwakidila mabènesha bu cisàmbà Cyèbè, Izàlèèlà to, kàdi tudi tukèba ànu kasùnsùkilà kàdi kàmata ku mèèsà à Mfùmù.”

205 Nènkù dilòòlò edi tudi baleejè Cyàkudyà cinène cyûdi Wèwè mudiiishe Èkèleeziyà Webè. Nè dilòòlò edi katwèna ànu nè tusùnsukilà to, kàdi tudi babiikidiibwe ku mèèsà. Mu bushùwà bwà bwalu kabyèna bikèngela bwà twètù kwangata tusùnsùkilà atu to, kàdi tudi nè disànkà dyà kutwàngata. Kàdi tudi babiikidiibwe ku mèèsà, dilòòlò edi. “Yesù ùdi nè mèèsà Èndè maadija kùdi bansantu bònsò bàà Nzambi bàdiishiibwa. Ùdi ùbiikila bantu Bèndè basungula bwà kulwabò nè kudyà.” Enzàku, dilòòlò edi, Taatù, bwà nè muntu yònsò udi nè dikèngela awu, wíkala mwà kutwilangana nendè.

206 Nènkù patùcidì nè mitù yètù miinyika apa, nè myoyi yètù mu didipwekesha kumpàlà kwà Nzambi, ndi ànu ndìkonka nè mbantu bûngi kaayi mu nzùbu emu, dilòòlò edi, bàdi kabàyi basungidiibwe, bwà nè bu Yesù mwà kulwa nè buloba bufwànyine kufika ku ndekeelu wabò dilòòlò edi, nè udi mufwànyine, udi ujinga kwangata kasùnsukilà kakesè kàà diitabuuja kàvwà katèèkiibwe mu mwoyi wèbè, nènkù lwàkù ku mèèsà dilòòlò edi, wenda uleeja kasùnsukilà kèèbè kàà diitabuuja aku kumpàlà kwà Nzambi, nè muswè bwà kwenza nànkù, udikù ànu mwà kwimana kuulu nè kulwa kùnweku, bwà twètù kukusambidila mwab’ewu ku cyoshelu eku anyi?

207 Udiku mwà kulwa kùyì ujànguluka anyi? Lwàkù ànu kumpàlà eku. Nzambi àkubènèshè mwanèètù wa balùme. Muntu mukwàbò ùdikù mwà kulwa anyi? Mukalenge ikalè neebè, mwanèètù wa bakàji. Lwàkù ànu kùnweku cyanààna. Nkufwànyinekù kwikala muntu mukwàbò kaaba aka udi ujinga kasùnsukilà kampàndà, udi mufwànyinekù kulwa ku mèèsà à Mukalenge anyi? Ambà nè: “Mukalenge, ncyèna mukumbànyine bwà kulwa to. Ndi—ndi . . . Ndi mbwa. Mèmè ndi ànu . . . Ncyèna mukumbànyine kupita mwàkadì mukàji awu to, kàdi nyéwù ndwa ànu bwà kasùnsukilà.” Udikù mwà kulwa anyi, mulundà wanyì ngènzàmpèkààtù? Lwàkù. Ncifwànyine kwikala musangu wèbè wà ndekeelu.

208 Nudi numòna mùdi bàà pa buloba bènda bàlwa leelù ewu anyi? Bantu kabàcyèna kàbidì baswè kulwa to. Mbikolè bwà wèwè kubàswishisha. Èvànjeeliyò, mbyenze ànu bu nè, ùyaaya mu madimi à bwambi’s.

209 Nzambi àkubènèshè, mwanèètù wa balùme mwîmpè. Nzambi àkubènèshè. Abi’s mbilenga be. Imànaayi ànu kaaba aka bwà katanci kakesè cyanààna.

210 Muntu mukwàbò àngatè ka—kaaba apa, àmbè nè: “Ndi mwimàne nè muntu ewu.” Mukalenge àkubènèshè, mwanàànyì wa balùme. Nzambi àkubènèshè. Ncyà bushùwà. Lwàkù ànu

kùnweku, wamba nè: “Ndi muswè kasùnsukilà, Mukalenge. Kasùnsukilà kàdi ànu kimpè bwànyì mèmè. Cintu kampàndà ncilengè mwoyi wànyì. Mpindyewu ndi mpweka.” Nzambi àkubènèshè, mwanàànyì wa balùme. Nzambi àkubènèshè, mwanèètù wa balùme. Imàna ànu mwab’ewu.

²¹¹ Muntu mukwàbò udi umvwa kasùnsukilà kakesè mu mwoyi wèbè, kàa diitabuuja, kàdi kafwànyine kukusàka bwà wèwè kulwa ku mèèsà mpindyewu. Udikù mufwànyine kulwa nè bansongààlùmè bànaayi aba biimàne mwab’ewu, bindile anyi? Mvwa muyiishe bwà mukàji kampàndà dilòòlò edi, nè mbantu balùme bàdi bàlwa. Kàdi bishi bwà bwalu abu, mwanèètù wa bakàji? Kwènàku muswè kulwa, wèwè pèèbè, bwà kasùnsukilà aku anyi? Udikù nè ndambù mukesè wa diitabuuja udi ukwambila nè udi mupiiile anyi?

Wèwè udi wamba nè: “Èè, mèmè ncyèna mumanyè cidi kasùnsukilà aku to, Mwanèètù Branham.”

²¹² Kasùnsukilà ke kàdi mu mwoyi wèbè mpindyewu aku, kàdi kàkwambila nè udi mupiiile. Udi nè cyà kunyingalala. Lwàkù, kî mmwòmò anyi? Juukà ùlwe nè kalolo kònsò, nè lùkàsà lwònsò, ku mpokolo mùle tètè nè Mashi. Kwènàku muswè bwà kupàtuka anyi? “Ndi mupiiile, mwanèètù. Nsambidilèku.” Lwàkù. Nzambi àkubènèshè, mwanèètù. Nzambi àkubènèshè.

²¹³ Kùdi mukwàbò muntu anyi? “Ndi muswè ànu kasùnsukila, Mukalenge. Kasùnsukila kakesè kàdi munda mwà mwoyi wànyì aka, ndi ndwa mpindyewu bwà kukàleeja.” Udikù mwà kulwa anyi?

²¹⁴ Mpindyewu kùdikù muntu kampàndà mwab’ewu udi mutwè cìmpìngà, muyè kule, nè muswè kulwa, udikù muswè kulwa mpindyewu anyi?

²¹⁵ Bàmwè bàdi kabàyi nè Nyumà Mwímpè, kabàyi bapetè Nyumà Mwímpè anyi? Kaa, mulundà wanyì, pìikalàbi nè Bukènkè ebu mbuvwijìbwe bwà cyà bushùwà menemene kùdi, mu ditùkù dyà ndekeelu emu, kwènàku muswè kulwa kwimana kuulu wèwè pèèbè anyi? Eci ncifwànyine kwikala cikondo cidi dijinga dinène aadi mu mwoyi wèbè, cintu kampàndà cìkwambila nè: “Ndi ngiitabuuja nè Mukalenge neàmpèèshè dibàtiiza dyà Nyumà dilòòlò edi. Ndi muswè kulwa, kwimana kuulu.” Lwàkù ku cyoshelu. Udikù muswè kucyènza anyi? Imàna neetù bwà disambila, wèwè udi umvwa kasùnsukila kakesè, kàa nè: “Ndi nkèngela Nyumà Mwímpè.” Pìikalà muntu mwà kufùmina ku Ohio kwàka, kulwa munwemu mu kandèkè kàa jet. Nzambi àkubènèshè Mwanèètù Grant. Presbytèrien ùdi mwà kubùukila ku Ohio, kulwa apa, mu kandèkè kàa jet bwà kwimana ku cyoshelu, kàdi twàmbè bishi bwà bantu bàdi mu Phoenix?

²¹⁶ Nzambi àkubènèshè, mwanèètù wa bakàji. Imàna ànu kaaba aka bwà katanci kakesè cyanàana. Kwèna muswè kulwa anyi?

Makòka mu mijilu yà Èmanùwèlè,

217 Kwênàku muswè kulwa mwaba wùdì Mpokolo mukàngula dilòlò edi, mûle ànu tètè nè bintu bimpè byà Nzambi anyi? Ndi ndikonka, patwikalà ànu mwà kwindila katanci, bwà bushùwà kùdi batámbe abu mwab'ewu, bàdì mwà kujinga kwangata tusùnsùkilà. Ncyà bushùwà nè bivwa bikèngela kwikalakù. Kwèna muswè kulwa anyi? Enzà wèwè ànu mündi nkulòmba amu, musangu wùmwè. Cyangàte ànu nè meeji matòòke ònsò mu mwoyi wèbè, wamba nè: “Ndi mpweka. Eci ke cyànyì cikondo cyà kulwa. Nèndwe, nànsha bishi.” Nzambi ànùbènèshè, nwènù bânà bèètù bàà bakàjì. Abi's mbîmpè be. Tudi bindile mpindyewu, nè lutùlù lwònsò, bwà wèwè kulwa.

218 Twìnyikàayi mitù yètù mpindyewu patùdì bindile apa, twîmbàayi musambu wà èkèleeziyà ewu.

Kùdi mpokolo mûle nè Mashi,
Makòka mu yà Emanùwèlè. . .

219 Kwèna muswe kulwa mpindyewu anyi? Kwèna mwà kwangata kasùnsukila kèèbè aku nè kulwa anyi?

. . .mwînshì mwà nkwaka awu

Wèwè muswè Nyumà Mwîmpè, kwèna muswèku kulwa, kubwela mpindyewu anyi?

Bàjimija dikeji dyàbò dyònsò dyà dipiilà,
Bàjimija dikeji dyàbò dyònsò dyà dipiilà;
Nènku bangènzàmpèkàatù biinyija
mwînshì. . .

Lwâkù's, mulundà wanyì.

Bàjimija byònsò. . .
Mwîvì uvwa upunga nè lufù wàkasànka pa
kumòna (. . .? . . .ànu ku cyoshelu eku. Nènku
nwènù. . .? . . .)

. . .nànsha mùdiye mubì wa nkòtòòtò amu,
Bàsùkula mpèkaatù wabò yònsò. . .

Nzambi àkubènèshè, mwanèètù wa balùme. Ke mùshindù wà kucyènza ngwòwò awu.

220 Ndi ndikonka bambi bàdì mwab'ewu mpindyewu nì mbafwànyine kulwa bwà kwimana neetù kaaba aka. Bambi bàdì mu nzùbu emu, lwâyì nwîmanè neetù kaaba aka, katanci kakesè mpindyewu, balongeshi bàdì—bàdì bàcyùka bwà misùukà mijîmine.

. . .mémè pàànyì, nànsha mündi mubì kumòna
bu yêyè amu,
Ngòweshiibwè ku mpèkaatù wanyì yònsò.

221 Ndi ndikonka ní kùdi bambi mwab'ewu, balongeshi bàà njila mu Díyì, bàdì baswè kulwa abu. Vùlukàayi nè, kwà kuya kwà Cyendèlèlè kùdi munkacì mwà kupàngàdikiibwa mpindyewu mene. Bantu batwè ku mwandamutekète anyi mwandamukùlù,

dikùmi mbôbò aba biimàne kaaba aka. Kàdi nudi bamanyè cìdici cyùmvwija anyi? Musùùkà wùmwèpelè wùdi nè mushinga wà malaba binunu dikùmi. Katwèna nè cyà kwangata eci nè mapeepeleja to.

²²² Mpindyewu, wêwè udi usaama, nè ujinga bwà bàkusambidila disambila dyà diitabuuja awu, udikù mwà kwimanyina ànu mwaba wùdi awu, wêwè udi usaama nè mu lukèngelu. Abi's mbimpè.

²²³ Mpindyewu, nwènù bambi naanyì, aci's cìdi ànu cyà bushùwà, tentèkèlaayi bantu aba byanza.

²²⁴ Mpindyewu, nwènù bantu bàdi bàsaama, imànaayi mu mùshindù wà batàmbe kusemena pàmwè, mu mùshindù wà bafwàne kuteentekelangana byanza muntu nè mukwèndè. Mpindyewu, Bible mmwambè, bwènù nwènù babèèdi nè: "Bimanyinu ebi nebifilè aba bàdi biitabuuja." Bikèngela wikale mwena kwitabuuja, cyanààna kuvwa mufwànyine kwikala mwimanè to. "Bôbò batentèkèle babèèdi byanza, babèèdi nebàsangalè." Nudi bamanyè nè aci ncyà bushùwà. Aci's m'Mifundu yidi kayiyi mwà kupangilakù to.

²²⁵ Nènku kùdi bàdi bànyingalala bàdi bàlwa ku cyoshelu aba, bàna bèètù bàà balùme nè bàà bakàji bàdi bàlwa ku cyoshelu dilòòlò edi aba, bantu bàà cifwàkà bàdi bamanyè nè bìdi bikèngela bwà wêwè kukùngamangana nè Nzambi musangu kampàndà. Bible mmwambè nè mpèkaatù yà bàmwè bantu yidi yibàdyànjidila, bàmwè yibàlonda. Udi utonda yèbè dilòòlò edi, bwà mpèkaatù yèbè yàmònakù mwà kuya kumpàlà kwèbè, nè kufwidiibwa luse ku Mashi à Mukalenge Yesù.

²²⁶ Nè nwènù kaaba aka bàdi nukèba dibàtiiza dyà Nyumà Mwimpè, Nzambi ngudi mwenzè mulayi mu Byenzedi 10. Tudi tubala nè: "Pàcivwà ànu Peetèlò wàmba méyi aa, Nyumà Mwimpè wàkapwekela aba bààkacitèèleja." Bàvwa nè nzala yà dikèma! Mpindyewu, wêwè udi nè nzala. Udi mulwè nè kasùnsukila kakesè aku mwab'ewu. Mpindyewu twàngatàayi bukula bwà cyà bushùwà mu kaabujimà bwà mabènesha à Nzambi. Byònsò abi bìdi mbwèbè wêwè.

²²⁷ Mpindyewu, nwènù bàdi biitabuuja disambila abu, twinyikààyaakù ànu mitù yètù pàmwè bwà kusambila mpindyewu nè kwitabuuja. Mpindyewu, pwàku ànu mwoyi nè nganyì udi ku luseke lwèbè awu. Manyà nè kakwèna muntu nànsha umwe pabwìpi neebè to ànu Yesù Kilistò. Nènku muntu nè muntu yònsò sambilà mùshindù wùtù usambila awu, mùshindù wùtù nè ciibidilu cyà kusambila awu. Nènku, bàna bèètù, tentèkèlaayi bantu aba byanza, nènku twitabuujaayi mpindyewu nè Nyumà Mwimpè neálwe bwà kwenza bintu bitùdi tulòmba ebi.

²²⁸ Taatù wetù wa mu Dyulu, katwèna tuumvwa nè tudi biimàne mwaba ewu bwà cyanààna to. Tudi tuKwela twasàkidila

bwà misùùkà eyi. Tudi bamanyè nè Wèwè udi kaaba aka mpindyewu bwà kubàsùngila. Ndi ndòmba bwà Wèwè kucyènza, Mukalenge. Swâkù bwà diitabuuja dyàbò ditangilè dyàmwàmwa dyà mundidimbì. Swâkù bwà bàdì bàkèba Nyumà Mwîmpè aba, bàdì nè byanza byà beena kwitabuuja bibàtentekela, babèèdì nè beena ntàtu abu, swâkù bwà bukolè bwà Nzambi bùbwele mu nzùbu emu, bùbànda bùpweka mu tujila etu, nè mu bantu aba. Nèku sùngilàku ngènzàmpèkààtù yònsò, ùjàku mwena kwitabuuja yònsò nè Nyumà Mwîmpè, nè ondòpàku mubèèdì yònsò. Enzàku bintu ebi, Mukalenge. Ndi ngiitabuuja nè Wèwè udi kaaba aka, nè Udi umweumwe awu makèèlèlè, leelù, too nè kashidi. Milayi Yèbè kayèèna mwà kupangilàku to.

²²⁹ Tudi twitabuuja nè Wèwè wàkatùma Èkèleeziyà Webè nè mudimu, nè bàakabànda ku cimenga cyà Yelusàlèma. Bàkaya ku cibambalu cyà kuulu, nè bàvwakù, dîbà dyònsò, bàtùmbisha nè bàbènesha Nzambi. “Ke dyàkàmwè kufùminakù mu Dyulu cyonà cyà Cipeepèlè cicolè cyà civuma, nè Cyàkuuja nzùbu mujimà mùvwàbo badisangishe.” Wèwè udi umweumwe awu, nè Udi nè bukolè bwà kwenza cintu cimwècimwè aci. Swâkù bwà bukolè, bwàkapwekà mu ditùkù dyà Mpenta abu, bùbàtùizè musùmbà wà bantu ewu dilòlò edi, mu bukolè bwà dibùikà dyà ku lufù dyà Yesù Kilistò. Ndi ndòmba disambila edi mu Dîna dyà Yesù, bwà bantu aba, bwà butùmbì bwà Nzambi.

²³⁰ Elàayi byanza byènù muulu mpindyewu. Disambila dyà diitabuuja dyàmanyi kwenjiibwa, disambila dyà diitabuuja dyà difwidiibwa dyà luse. Elàayi byanza byènù muulu nwamba nè: “Mukalenge àtumbè.” Bangàayi ànu kuMutùmbisha nè kuMubènesha. Tondàayi ànu mpèkaatù yènù. Tond- . . Itàbùùjà nè mwoyi wèbè wònsò. Elàayi byanza byènù muulu kùdì Nzambi, nwamba nè: “Twasàkidila, Mukalenge Yesù. Ndi ngiitabuuja nè, mu kasunsa emu, Wèwè udi umpèèsha Nyumà wa Mukalenge, Wambàtùiji nè Nyumà Mwîmpè nè wampèèshi mabènesha.”

Èyo, mwanèètù wa bakàji, lwàkù . . . ? . . . 

63-0113^E Dinà nukila
Foursquare Church
Phoenix, Arizona États-Unis

CILUBA

©2026 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Dîyî dya bwena-cintu

Makenji ônsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwê anyi bwa kupeeshangana, kabiya bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijiibwa bya bipitepite, kwediibwa mu cibànzà cya lùntàndalà, kulamiibwa mu cikàlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyî wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS

P.O. Box 950, JEFFERSONVILLE, INDIANA 47131 U.S.A.

www.branham.org